

Mateyo

¹ Ibbuku lyabansiku ba Jesu Kkilisito, mwana wakwe Devidi, mwana wakwe Abbulahamu.

² Abbulahamu wakali wisi wa Ayizeki, alakwe Ayizeki wisi wa Jakobu, alakwe Jakobo wisi wa Juda abakulana bakwe.

³ Juda wakali wisi wa Pelezi a Zela kuli Tamala, Pelezi wisi Hezelani alakwe Hezelani wisi wa Lamu.

⁴ Lamu wakali wisi wa Aminadabbu, Aminadabbu wisi wa Nasoni, alakwe Nasoni wisi wa Salumoni.

⁵ Salumoni wakali wisi wa Bbowazi kuli Lahabbu, Bbowazi wisi wa Obbedi kuli Lute, Obbedi wisi wa Jese.

⁶ Jese wakali wisi wa Mwami Devidi Mwami, Devidi wisi wa Solomoni kuli muka Uliya.

⁷ Solomoni wakali wisi wa Lehobbowamu, Lehobbowamu wisi wa Abbija, Abbija wisi wa Asa.

⁸ Asa wakali wisi wa Jehosiafati, Jehosiafati wisi wa Jolamu, alakwe Jolamu ngusikale wa Uziya.

⁹ Uziya wakali wisi wa Jotamu, Jotamu wisi wa Ahazi, Ahazi wisi wa Hezekkiya.

¹⁰ Hezekkiya wakali wisi wa Manase, Manase wisi wa Amoni, alakwe Amoni wisi wa Josiya.

¹¹ Josiya wakali sikale wa Jekoniya antomwe abakulana bakwe kuchindi chakutolwa kubuzike ku Bbabbiloni.

¹² Musule lyakulonzegwa kutolwa ku Bbabiloni, Jekoniya wakali wisi wa Sialitiyeli, Sialitiyeli wakali sikale wa Zelubbabbeli.

¹³ Zelubbabbeli wakali wisi wa Abbiyudi, Abbiyudi wisi wa Eliyakkimu, alakwe Eliyakkimu wisi wa Azola.

¹⁴ Azola wakali wisi wa Zadoki, Zadoki wisi wa Akkimu, alakwe Akkimu wisi wa Eliyudi.

¹⁵ Eliyudi wakali wisi wa Eliyazali wisi wa Matani, alakwe Matani wisi wa Jakobo.

¹⁶ Jakobo wakali wisi wa Josefa mulumi wa Meli, oyo wakazyala Jesu ooyo utegwa Kkilisito.

¹⁷ Woonse mazyalani kuzwa kuli Abbulahamu kusika kuli Devidi akali mazyalane ali ikkumi aane, kuzwa kuli Devidi kusika kukulonzegwa kwabo kutolwa ku Bbabiloni mazyalane ali ikkumi aane, alimwi kuzwa kukulonzegwa kutolwa ku Bbabiloni kusikila kuli Kkilisito mazyalane ali kkumi aane.

¹⁸ Kuzyalwa kwa Jesu Kkilisito kwaka chitika munzila itobela. Banyina, Meli bakatangilwakuti bakwatwe a Jozefu, pesi kabatana kuswanana, wakajanika kuti wakali mintide kumuuya uusalala.

¹⁹ Pesi Jozefu, mulumi wakwe, wakali mwalmu ululeme alimwi tewakayanda kumufwisya bweeme pe chaantanganana, aboobo wakayeya kumuleka chuumunizi akusiya chizuminano chabo.

²⁰ Awo mpakali kuyeeya ezi zintu, mungelo wa Mwami wakaboneka kulinguwe muchiloto, waamba kuti, “Jozefu mwana wa Devidi, utayowi pe kubweza Meli kuti abe mwanakazi wako,

nkambo oyo umintidwe mulinguwe umintidwe a Muuya Uusalala.

²¹ Uyozyala mwana mulombe, alimwi uyomuzika izina lyakuti ngu Jesu, nkambo uyofutula bantu bakwe kuzwa kuzibi zyabo.”

²² Zyonseezi zyakachitika kuzuzikizya zyakaambwa a Mwami kwindi kubasinsiimi, wamba wati,

²³ “Amubone, ooyo musimbi uzominta uzotumbuka mwana mulombe, mpawo izina lyakwe bazomuzika kuti ngu Imanuwele” - elyo lipandululwa kutegwa, “Leza ulandiswe.

²⁴ Jozefu wakabuka kuzwa kukoona kwakwe wachita mbuli mungelo wa Mwami mbakamulayilila, mpawo wakamubweza waba mwanakazi wakwe.

²⁵ Pesi takwepe nakamuziba kusika watum-buka mwana mulombe. Elyo wakamuzika izina kuti ngu Jesu.

2

¹ Nikwakamana kuzyalwa kwa Jesu muB-betelehemu waku Judiya mumazuba a Mwami Helodi, balumi bayiide bazwa kujwe bakasika mu Jelusalema kabamba kuti

² “ulikuli ooyo wakazyalwa kali Mwami waba Juda? Twakabona nyenyezi yakwe kujwe alimwi twaza kuzomukomba.”

³ Awo Helodi Mwami nakamvwa eechi, zyaka-mukatazya abantu boonse mbakali abo mu Jelusalemu.

⁴ Helodi wakabeta amwi boonse bapaizi bapati alimwi abalembi babantu, mpawo wakababuzya, “Nkukuli Kkilisito nkwayozyalilwa?”

⁵ Bakaamba kuti kulinguwe, “Mu Bbetelehemu wa Judiya, nkambo oobu mbubo mbukwakalem-bwa amusinsiimi,

⁶ Pesi iwebo, Bbetelehemu, chisi cha Judiya tamuli banini pe akati kabendelezi baJuda, nkambo kuzwa kulinduwe kuyozwa uyowendelezya, uyoyembela bantu bangu Izilayeli.”

⁷ Mpawo Helodi chakusisikizya wakiita baalumi bayiide kuti abuzye kuti nchiindinzi loko inyenyezi niyakaboneka.

⁸ Wakabatuma kuBbetelehemu, wati, “kamuya mukamulangule chabusongo, mwana munini. kuti naa mwakumujana, mundetele mazembe ambebo inga ndilabola kuzomukomba.

⁹ Nibakamaninsya kumvwa Mwami, bakeenda anzila yabo, alimwi inyenyezi njibakalibwene kujwe yakabazulwida kusikila yayimikila awo mwana munini mpakalibede.

¹⁰ Aboobo nibakabona inyenyezi, bakabotelwa alukondo lupati.

¹¹ Bakanjila mung'anda bamubona mwana munini antomwe a Meli banyina. Bakawidaansi akumukomba. Bakavununa buvubi bwabo mpawo bamupa izipo zyangolida, tununkilizyo atwa mili.

¹² Leza wakabachenjezya kumaloto kuti batajokeli pe kuli Helodi, aboobo bakajoka kunyika yabo anzila imbi.

¹³ Nibakabuka akwenda, mu ngelo wa Mwami wakalibonia kuli Jozefu muchiloto wamba wati,

“Buka, bweza mwana munini abanyina, uchijile ku Ijipita. Ukkale mumo kusikila ndikwambile, nkambno Helodi uyomulanguula mwana munini kuti amuzimaazye.”

¹⁴ Mansiku ngawo aayo Jozefu wakabuka wamubweza mwana munini antomwe abanyina mpawo wanyampuka winka ku Ijipita.

¹⁵ Wakakkala nkukoko kusikila lufu lwa Helodi. Eechi chakazuzikizya eecho chakaambwa a Mwami kwiinda kumusinsiimi, “Kuzwa mu Ijipita ndamwiita mwana wangu.”

¹⁶ Mpawo Helodi, naakabona kuti weenwa abalumi bayiide, wakanyema kapati. Wakatumina akujaya boonse bana balombe bakali mu Bbetelehemu azisi zyoonse zizyungulukide bakaala minyaka ibiili kaziya ansi yakuzyalwa kakwendelana a chiindi mbuuli mbwakaziba kubaalumi bayiide.

¹⁷ Lino chakazuzikizya chakaambwa kwiinda kumusinsiimi Jelemiya.

¹⁸ “Ijwi lyakamvwigwa mu Lama, kulila a koomoka, Lakkeli ukwilila bana bakwe, alimwi wakkaka kumbulizigwa, nkambo tabachiwo.”

¹⁹ Elyo Helodi nakaafwa, langa mungelo wa-Leza wakaboneka muchiloto kuli Jozefu mu Ijiputi akwamba kuti,

²⁰ “Buka akubweza mwana a banyina akuya kunyika ya Izilayeli, nkambo abo bakalikuvwima buumi bwamwana bakafwa.”

²¹ Jozefu wakabuka, wakabweza mwana a banyina, akuboola munyika ya Izilayeli.

²² Pesi nakamvwa kuti Achelawusi wakali kwendelezya atala a judiya abusena bwawisi

Helodi, wakayoowa kwiinka nkuko. Naka-
mana kumuchenjezya Leza muchiloto, wakazwa
wayakuchisi chaba Gilili

²³ alimwi wakinka wakukkala mudolopo
pati litegwa Nazaleta. Echi chakazuzikizigwa
chakaambidwe kwinda kubasinsimi, kuti
uyoyitwa kutegwa mu Nazaleta.

3

¹ Mumazubayo Joni mubbabbatizyi wakasika
kakambawuka munkanda yaku Judiya kawamba
kuti,

² “Amusanduke, nkambo Bwami bwakujulu
bwaba afwifwi.”

³ Nkambo oyu ngonguwe iwakambwa amusin-
simi Isaya kuti, “Ijwi lyayooyo uwompoolola
mulusaka munkanda, Ámululamike inzila ya
Mwami, muchite kuti nzila zyakwe zilulame.”

⁴ Lino Joni wakalikusama boya bwa nkamela
abbanti lyachikumba muchibuno chakwe. Kulya
kwakwe zyakali nsozi abuchi bwamulusaka.

⁵ Mpawo Jelusalema, Judiya yonse, azilikiti
zyoonse zizyungulukide mulonga wa Jolodani
zyakayinka kulinguwe.

⁶ Bakabbabbatizigwa anguwe mumulonga wa
Jolodani, kabalyamba izibi zyabo.

⁷ Pesi nakabona kuti ba Falisi bayingi abasim-
ulawu kabeza kulinguwe kuti ababbabbatizye,
wakabambila kuti, “Inywe nizyalani lyabachip-
ile, ngwani wakamuchenjezya kuchija bukali
buza.

⁸ Amuzyale michelo yeleva kusanduka.

⁹ Mutayeyi kamwamba kuti akati kanu, 'Tula Abbulahamu wamataatesu. Nkambo ndamwambila kuti Leza ulakonzya kubusya bana ba Abbulahamu nikuba kuzwa kumabwe.

¹⁰ Kabikwa kale kaleba kumiyanda yaminsamu itazyali michelo mibotu ulagonkwa akuwalilwa mumulilo.

¹¹ Ndamubbabbatizya amanzi kuti musanduke. Pesi oyo uuzwa musule lyangu ulenguzu kwiinda ndime, alimwi tandeleda nikuba kunyampula manyatela akwe. Uyomubbabbatizya a Muuya Uusalala amulilo.

¹² Ipanga lyakwe lilimumanza akwe kuti akukule lubuwa lwakwe akubungania witi munganda yachiyobwedo. Pesi uyowumpa buungu amulilo kuti obo butakonzeki kubikwa anze."

¹³ Mpawo Jesu wakasika kuzwa ku Galili akuya kumulonga wa Jolodani kuti akabbabbatizigwa a Joni.

¹⁴ Pesi Joni wakasyezye kumukasya, kaamba kuti, "Ndiyanda kubabbatizigwa anduwe, ani wasika kulindime biyeni?"

¹⁵ Jesu wakamuvwiila wati, "chizuminine lino, nkambo kuleleda kuti swebo tuzuzikizye bululamiboonse. Mpawo Joni wakamuzumizya.

¹⁶ Nakamana kubabbatizigwa Jesu wakazwa mpawawo mumeenda, amulange, majulu aka-julilwa nguwe. Wakabona Muuya wa Leza kuuseluka ansi mbuli inziba akukkala alinguwe.

¹⁷ Amulange, ijwi lyakazwa kuzwa kumajulu kalyamba kuti, "Oyu ngu Mwana wangu ngundiyandisya. Ndilabotelwa anguwe.

4

¹ Mpawo Jesu wakazulwidwa a Muuya kuya munkanda kuti akasunkwe asimwaba.

² Lino nakalyimya mazuba makumi aane amansiku ali makumi aane, wakaba enzala.

³ Sikusunka wakasika akwamba kuti kulinguwe, “kuti koli mwana wa Leza, layilila mabwe aya kuti abe chinkwa.”

⁴ Pesi Jesu wakasandula akwamba kuti kulinguwe, “Kulilembedwe kuti Muntu takoyopona achinkwa luzutu, pes ajwi lyoonse lizwa kumulomo wa Leza.”

⁵ Mpawo simwaba wakamutola kuchisi chisalala akumukkazika aatala ansonge yanganda ya Leza,

⁶ akwamba kuti kulinguwe, “Na koli mwana a Leza, liwalile aansu, nkambo kulilembedwe kuti uyolayilila bangelobakwe kuti bakubambe; alimwi, bayokubaka mumaanza abo, kuti utakalyumpuni abbwe.”

⁷ Jesu wakabambila kuti, “Alubo kulilembedwe kuti, utasunki Mwami Leza wako.”

⁸ Alubo simwaba wakamutola kukalundu kalamfu akumutondezya Bwami boonse bwanyika abulemu bwayo bonse.

⁹ Wakamwambila kuti, “zyonse zintu eezi ndiyokupa, kuti wandivundamina akundikomba.”

¹⁰ Mpawo Jesu wakamwambila kuti, zwaawa, siluuni! Nkambo kulilembedwe kuti, uyokomba Mwami Leza wako, akukutawukila nguwe luzutu.”

¹¹ Mpawo simwaba wakayinka, Amubone bangelo bakaza akumukutawukila.

¹² Lino Jesu nakamvwa kuti Joni wakaabwa wakazwa waya ku Galili.

¹³ Wakazwa mu Nazaleta akwinka kuyokkala muKkapenawuma, ilikumbali lyalwizi lwa Galili mumasena a Zebbuluni a Nafutali.

¹⁴ Eezi zyakachitika kuti kuzuzikizigwe zyakaambwa amusinsiimi Isaya kuti,

¹⁵ “Chisi cha Zebbuluni achisi cha Nafutali kaziya kulwizi, luli kunembo lya Jolodani, Galili wabamasi!

¹⁶ Bantu bakalikkede mumudima babona mu-muuni mupati, akulibaabo bakalikkede muchilikiti amumwenzule walufu, alimbabo kwanyamuka mumuuni.”

¹⁷ Kuzwa kulecho chindi Jesu wakatalika kukambawuka akuti, “Amusanduke, nkambo Bwami bwakujulu bwasika afwifwi.”

¹⁸ Nakali kwenda ambali lyalwizi lwaGalili, wakabona bana bakwabo babili, Sayimoni utegwa Pita, a Endulo mukulana wakwe, bakali kuwala tuzamba mulwizi, nkambo bakali bazubi babaswi.

¹⁹ Jesu wakati kulimbabo, “amuze, munditobele, alimwi ndiyomuchita kuba bazubi babantu.”

²⁰ Mpawawo bakasiya tuzamba bamutobela.

²¹ Jesu nakali kuyabwenda kuzwa mpawawo wakabona bambi bana bakwabo babili, Jemusi mwana a Zebbedi, a Joni mukulanakwe. Bakali mubwato awisi Zebbedi kabali kusuma tuzamba twabo. Wakabayita,

²² Alimwi mpawawo bakasiya bwato awisi akumutobela.

²³ Jesu wakiinka mu Galili yoonse, kay-

obuyiisya muzikombelo, kakambawuka makani mabotu a Bwami akusilika misyobo yamalwazi amachise akali mubantu.

²⁴ Impuwo atala anguwe yakamwayika mu Siliya yoonse, alimwi bantu bakeeta boonse bakali kuchiswa misyobo-misyobo yamalwazi amachise, abaabo bakanjidwemyuuya mibi, basimasuntu, abayuminide mibili, Jesu wak-abasilika.

²⁵ Makamu makamu abantu akamutobela kuzwa kuGalili, Ba Dekkapolisi, Jelusalemu, aku Judiya, akuzwa kunembo lya Jolodani.

5

¹ Jesu naakabona makamu makamu aabantu wakatanta aatala aachilundu. Akkale biyo, baskwiiya bakwe bakaswena kulinguwe,

² eelyo wakabbanuna mulomo wakwe, wak-abayiisya kuti,

³ “Bali achoolwe bachete mumuuya, nkaambo bwami bwakujulu mbubwabo.

⁴ Bali achoolwe aabo balila, nkaambo bazowu-uzigwa.

⁵ Bali achoolwe aabo balibombya, nkaambo bazoovuba nyika.

⁶ Bali achoolwe aabo bafwa nzala yabululami anyota yambubo, nkaambo bazoookkuta.

⁷ Bali achoolwe beetelezi, nkaambo mbobonya bazooyetelelwa.

⁸ Bali achoolwe aabo basalala mumoyo, nkaambo bazoobona Leza.

⁹ Bali achoolwe basikutontozya, nkaambo bazootegeba bana ba Leza.

¹⁰ Bali achoolwe aabo bapenzegwa nkaambo kubululami, nkaambo bwami bwakujulu mbubwabo.

¹¹ Inywe muli achoolwe nibazoomutukila akumupenzya akumutamikizya zintu zibi zyoonse zyakubeja nkaambo kandime.

¹² Amukombe akusekelela, nkaambo bulumbu bwanu bwakujulu mbupati, nkaambo mbubonya oobo mbubakapenzya basinsimibakali kunembo lyanu.

¹³ Ndinywe munyo wanyika, pesi munyo kuti, wasampuka ulungwe buti tuuchikwe mulimo pesi kuswewegwa buyo akulyatawilwa abantu.

¹⁴ Ndinywe mumuni wanyika. Muunzi uyakidwe aatala achilundu tukonzyi kusiongwana.

¹⁵ Alimwi bantu nibamunikalampi tabalibiki muni lyalusuwo, pesi balalibika aachibikilo kuti limunikile boonse bali mung'anda.

¹⁶ Mbubonya oobo mumuni wanu umunike kunembo lyabantu kuti babone milimo yanu mibotu, balemeke wuso wanu ulikujulu.

¹⁷ Mutayeeyi kuti ndeza kuzoojaya mulawu nibaba basinsimi. Teensi kiujaya nkuzidide pe, ndizide kukulondola.

¹⁸ Nkaambo ndamwaambila chakusinizya kuti julu anyika zyoonse zilakonzya kumana, pesi tachikonzeke kuti kamane kabala nikaba komwe nikaba kazila komwe kamumulawu mane lumwi zintu zyoonse zikachitwe.

¹⁹ kaako umwi awumwi usotoka nikaba kanini akati kamilazyo eeyi, alimwi ulayiisya bantu mbubonya oobo, ooyo uzotegwa muniini mubwami bwakujulu, pesi umwi awumwi uyilomya,

alimwi ulayiisya ooyo uzoategwa mupati mubwami bwakujul.

²⁰ Nkaambo, ndamwaambila kuti, bululami bwanu kabutayindi bululami bwabalembi abwaba Falisi, tamukanjili mubwami bwakujulu.

²¹ bantu bakalekale mbubakaambilwa kuti, utajayi, umwi amwumwi uujaya uleede kubetekwa.

²² Pesi mebo ndamwaambila kuti, umwi awumwi uukalalila munyina uleede uleede kubetekwa. Alimwi umwi awumwi uusampawula munyina uleede lubeta lupati, pesi umwi awumwi utukila uleede mulilo wa Gehena.

²³ kaako kuti kuli mukutuula chipo chako nkukonya ooko kunembo lyachipayiliilo, uye ukasangune kuyanzaana amunyoko,

²⁴ kosiya chipo chako kunembo lyachipayiliilo, akwiinka kunzila yako. Lutaanzi koyanzaana amunyoko, mpawo usike akuzootuula chipo chako.

²⁵ Fwambaana kuzuminana asinkondo nyokwe nochili aawe munzila, kuti sinkondo nyokwe atakutoli kumubetesi, alkwe mubetesi atakutoli kumupolis, alakwe mupolisa atakubiki muntolongo.

²⁶ Kasimpe ndamwaambila kuti tokoozwa oomo mane ukaliye nikaba kasyaalizi

²⁷ Mwakamvwa mbukwaambwa kuti, 'utachiti bumambi.'

²⁸ Pesi mebo ndamwaambila kuti, umwi awumwi weemuuzya mwanakazi wamuchitya kale bumambi mumoyo wakwe.

²⁹ Na liso lyako lyalulyo lyakulebya, uligwisye ulisowe nkaambo kulakubotela kuti ufwidwe

chipanzi chomwe kwiinda kusowelwa mu Gehena mubili wako woonse.

³⁰ Alimwi kuti jaanza lyako lyalulyo lyakulebya, ulikosole ulisowe, nkaambo kulakubotela kuti ufwidwe chipanzi chomwe kwiinda kusowelwa mu Gehena mubili wako woonse.

³¹ Alimwi kwakaambwa kuti, umwi awumwi uuleka mukakwe amupe lugwalo lwakulekana.

³² Pesi mebo ndamwaambila kuti, umwi awumwi ulekede mukakwe kutaamba kuti nkaambo kakuvuulakuluumbi, wamuchitya bumambi alimwi umwi awumwi ooyo mwanakazi uleledwe wamuchitya bumambi.

³³ Mwakamvwa bantu bakalekale mbubakaambilwa kuti, utakombi chakubeja uchitile Jehova mbubonya oobo mbuwakakonkezya.

³⁴ Mebo ndamwaambila kuti, utakonki pe nikuba bunini, nikuba kujulu nkaambo nchichuuno chabwami bwa Leza.

³⁵ Nikuba kunyika nkaambo nchichuuno chamawulu aakwe, nikuba ku Jerusalem, nkaambo ngumuunzi wamwami mupati.

³⁶ Alimwi utakonki kumutwe wako, nkaambo tokonzyi kusandula kasusu nikaba komwe kati katube na kasiye.

³⁷ Kwaamba kwanu akube, Ii ii, na pe, nkaambo nzyoonse ziyungizigwa zilazwa kumubi.

³⁸ Mwakamvwa mbukwakaambwa kuti, liso kuliso lino kulino,

³⁹ mebo ndamwaambila kuti utamutontekki muntu mubi pesi muntu umwi awumwi ukuuma seya lyalulyo

⁴⁰ Alimwi uuli buti uyanda kukubika kaambo akunyanzya chikobela chako, mulekele achalo chibaki chako.

⁴¹ Alimwi ukusungilizya kuyumuna musinzo omwe, musindikile musinzo yobile.

⁴² Umwi awumwi ukumbila kwako umupe, mpawo umwi awumwi kukolota kwako uta-mufutatili pe.

⁴³ Mwakamvwa mbukakaambwa kuti yanda mweenzinyokwe, pesi sinkondo nyokwe umusule.

⁴⁴ Mebo ndamwaambila kuti amuyande basinkonyokwe mubakombe bamupenzya,

⁴⁵ kuti mube bana bakwe uso wanu uli kujulu nkaambo ulapusuzya zuba lyakwe kubabi akubabotu, ulawisizya mvulakuli boonse baluleme abataluleme.

⁴⁶ Kuti kamuyanda aabo bamuyanda ino mbu-lumbuunzi mbumujisi? sa abalo basimutelo tabachiti mbubonya oobo?

⁴⁷ Na mwazuminina bakwanu, muchita buti zi-inda kulibamwi? Sena abalabo bamasi tabachiti mbubonya?

⁴⁸ Nkaambo kaako amulondoke mbuli uso wanu uli kujuliu mbwalondokede

6

¹ Amuchenjele kuti mutachiti milimo yanu iluleme kumeso abantu kuti mwebelwe ambabo. Mwachita obo, tamukwe bulumbu kuli Uuso wanu uulikujulu.

² Nkambo kaako chindi nchowabila bantu izipo utasibi imwembo kubusyu bwabo mbuli mbubachita basikuupawupa

ameso muzikombelo amumigwagwa,
kuti batembawulwe kubantu. Nchobeni
ndamwambila kuti balijene kale bulumbu
bwabo.

³ Pesi webu, ichindi nchowabila bantu zipo
ijanza lyako lyakululyo litazibi mbulichita
lyakuchimwensi.

⁴ Kuti zipo zyako zibe kumbali, lino Uuso
ubonena kumbali uzokulumbula.

⁵ Alimwi chindi nchomukomba mutabi mbuli
basikupawupa amenso nkambo balayanda
kukomba bwimvwi muzikombelo amuzyooko
zyamigwagwa mipati kuti babonwe kubantu.
Nchobeni ndamwambila kuti balijene kale
bulumbu bwabo.

⁶ Iwebu chindi nchokomba njila muchimpetu
chako ulijalile kumulyango ukkombe kuli Uuso
uubonena kumbali uzokulumbula.

⁷ Alimwi mukukomba kwenu mutayindululi
mbuli mbubachita bamaasi, nkambo balayeya
kuti balaswililwa kukubwanta kwabo.

⁸ Nkinkaako, mutakozyani abo nkambo Uuso
wanu ulikujulu ulizi zintu zyonse nzimubula
kamutana kumubuzya

⁹ mbuboobu mbumwelede kukomba: 'Taata
wesu ooli kujulu, alilemekwe izina lyako, abuze
bwami bwako.

¹⁰ Aluchitwe luyando lwako, ansi aano
mbubonya mbuli kujulu.

¹¹ Utupe sunu zilyo zitwelede.

¹² Utulekelele milandu yesu, mbubonya mbuli
mbutu balakelela aswe bali amilandu kuli
ndiswe.

¹³ Utatwenzyi mukutempawulwa. Utuvune

kumubi, nkambo bwami mbubwako anguzu, abulemu, mane kukabe kutamani. Amen.

¹⁴ Nkambo mwalekelela bantu milandu yabo alakwe Uusowanu ulikujulu ulamulekelela anywebo.

¹⁵ Pele mwatabalekelela bantu milandu yabo anywebo tamukoyolekelelwa.

¹⁶ Alimwi chindi nchomulyiimya kulya mutabi mbuli basikuwupawupa amenso, nkambo balo balawungumana, balabisya masyu aabo, kuti baboneke kubantu mbubalyimya kulya. Nchobeni ndamwambila kuti balijene kale bulumbu bwabo.

¹⁷ Pele chiindi ncholyimya kulya webu, ubotye mutwe wako akusamba kumenso aako.

¹⁸ Kuti kulyiimya kwako kutaboneki kubantu pele kuli Uso uuli kumbali lino Uso uubonena kumbali uzokulumbula.

¹⁹ Mutaliyobwedi lubono aansu ano mpaabisya mapempe ankalaya ababbi mpobatulula kuti babbe.

²⁰ Amuliyobwede lubono lwakujulu nkwatabisyi mapempe ankalaya, ababbi nkubatatululi kuti babbe.

²¹ Nkambo lubono lwako nkulubede nkukonya oko nkubede moyo wako.

²² Ilampi lyamubili ndinso nkambo kaako linso lyako kuti kalili sibuyi mubili wako woose ulazula mumuni.

²³ Anukuti linso lyako kalili abutavu mubili wako woose lino mumuni mulinduwe wakali mudima. Mudima wayo ulasiya mbi.

²⁴ Takwe muntu ukonzya kumanina baami bobile milimo nkambo ulasula umwi ulayanda

umwi na ulakakilila umwi akusampawula umwi. Tamukonzyi kubelekela Leza antomwe alubono.

²⁵ Nkambo kaako ndamwambila kuti, mutalibilikili kubuumi bwanu kuti tukalyeenzi? Nikuba kumibili yenu kuti, tukasamenzi? Buumi bwenu tabwiindi zilyo awalo mubili sa tuyindi zyakusama?

²⁶ Amulange bayuni bakujulu nkambo tababyali tabatebuli, tabayoboli mumatala, nekuba boobo Uusowanu ulikujulu ulabasanina. Sa inywe tamuyandiki kwindi mbabo?

²⁷ Ngwani akati kenu ulibilika ukonzya kukomezya chiimo chakwe nikuba kakokola komwe?

²⁸ Alimwi nkamboonzi mulalibilikila zyakusama? Amuyeye masamu amusokwe mbwamena, tabeleki, takonzyi kuluka,

²⁹ pele ndamwambila kuti naba Solomoni mubulemu bwakwe boonse takakonzya kusama mbuli limwi akati kanzizyo.

³⁰ Lino kuti Leza kasamika boobo maani amusokwe, aaliko sunu pele ijunza alasowelwa muchikko, sa takayindi loko kumusamika anywebo nobasilusyomo lunini.

³¹ Nkambo kaako mutalibiliki akaamba kuti tukalyeenzi? Tukanyweenzi? Tukasamenzi?

³² Nkambo kazeezi zyoonseni nzibayandula bamaasi, alimwi Uusowanu ulikujulu ulizi kuti eezi zyonse zilayandwa kulindinywe.

³³ Pele amusangune kuyandula bwami bwa Leza abululami bwakwe eelyo zintu ezi zyoonse mulaziyungizigwa azyalo.

³⁴ Nkambo kaako mutalibilikili zyejunza,

nkambo bwejunza bula lilibilikila bwini. Buzuba
bwasunu bulizulide mapenzi abo bwalo.

7

¹ Mutabeteki, nkambo muzobetekwa.

² Alubeta ndomutakabeteke alo muyobetekwa
aandulo, achelesyo nchimuyoyelesya,
muyokuyeleszegwa anchicho.

³ Nkambonzi nulanga katanda kali mulinso
lyamukulana wako, pele wasiya itanda lili
mulinso lyako?

⁴ Chilakonzeka na kuti utedi kumukulana, leka
ndikugusye katanda kali mulinso lyako; kakuli
tanda mulinso lyako?

⁵ Inywe nobasikuupaupa! Tanguna ku-
gusya itanda lilimulinso lyako, alubo ulakonzya
kubona kabotu katanda kalimulinso lyamuku-
lana wako.

⁶ Mutapi zisalala kubankala, alubo mutasoweli
zibi kumpela angulube. Ulabona zyalyatuulwa
aansi amawulu, alubo zilasanduka akumudab-
ula mutu fwapufwapu.

⁷ Amukumbile, alubo muyopegwa. Amuyan-
dawule, mulajana. Amukonkomone mula-
julilwa.

⁸ Nkambo umwi awumwi ukumbila
ulatambula, alakwe uyanduula ulajana alakwe
uukonkomona ulajulilwa.

⁹ Nguli muntu akati kenu uupa mwanaakwe
ibbwe, amukumbila insima?

¹⁰ Alimwi, kuti wakumbila imuswi, sa ulamupa
inzoka?

¹¹ Lino mbuli bmumuzi kupa bana benu zintu zibotu, inywe nobabi, alakwe Wuso wenu ulikujulu sa tazoyindi loko kupa zintu zibotu kulibaabo bamukumbila?

¹² Nkaambo kaako zintu zyoonse zili buti nzimuyanda kuti bantu bamuchitile, anywebo amubachitile nzizyoonya, nkambo mbubooobo mbuwamba mulawo abasinsimi.

¹³ Amunjile mumulyango umanikide, nkambo mulyango ukwazamukide anzila impati njiitola kukunyoonyoka, nkabela abo banjila mulinjiyo mbanji banji.

¹⁴ Pesi mulyango umanikide anzila ipatide njiitola kubuumi, nkabela abo banjila mbatche.

¹⁵ Amuchenjelele basinsimi babeji beeza kulindinywe basamide zyakusama zyambelele, anukuti mukati lyabo mbawumpe babutambo.

¹⁶ Michelo yabo njiiti muzibye mbubabede. Sa kulachelwa masansa kumuunga niziba inkuyu kumutubatuba?

¹⁷ Mbubonya obo musamu umwi awumwi mubotu ulazyala michelo mibotu, alimwi musamu usampawukide ulazyala michelo mibi.

¹⁸ Musamu mubotu tukonzyi kuzyala michelo mibi, alimwi musamu usampawukide tukonzyi kuzyala michelo mibotu,

¹⁹ Musamu umwi awumwi utazyali michelo mibotu ulatemwa akusowelwa mumulilo.

²⁰ Aboobo michelo yabo njita muzibye mbubabede.

²¹ Boonse bandambila kuti, Mwami, Mwami, teensi mbabo bayonjila mubwami bwakujulu, ngooyo uuchita luyando lwa-Taata uli kujulu.

22 Kubuzuba obo banji banji bayondambila njako alimwi sa teensi kuzina lyako nkut-wakatanda madayimona Sa teensi kuzina lyako nkotwakachita milimo mipati myiingi?"

23 Lino nzobaambila kuti, nsimuzi pe, amuzwe kulindime inywe nubamuchita zibi!"

24 Nkambo kaako umwi awumwi uuswilila majwi aangu aya akwachita uzokozyanisigwa amuntu uchenjede iwakayaka ing'anda yakwe atala amwaala.

25 Lino imvula yakawa nyingi, milonga yakeeta, amyuwo yakawunga, yakawuma ang'anda eyo, nekuba boobo teyakawa pe, nkambo yakatalikilidwe aamwala.

26 Pele umwi awumwi uuswilila majwi aangu aya akutachita uzokozyanisigwa amuntu mu-fuba fuba iwakayaka ing'anda yakwe amusele,

27 lino niyakawa imvula milonga yakeeta, myu-uwo yakawunga, yakawuma ang'anda eyo, elyo yakawa, nkabela buwe bwayo bwakakomena.

28 Lino Jesu nakamana kwamba majwi aya oonse, makamu makamu abantu aka kankabala kukuyiisya kwakwe,

29 nkambo wakali kubayiisya chabwami kutakozyenie abalembi babo pe.

8

1 Chiindi Jesu nakaseluka kuzwa muchilundu makamu mingi akamutobela.

2 Eelyo, sichinsenda wakasika kulinguwe alimw wakamufugamina, wakati, "Mwami na kuzumina ulakonzya kundisalazya.

³ Jesu wakatambika kuboko kwakwe alimwi wakamwampa, wakati, “Ndilazumina. Salala.” Mpawawo wakasalazigwa kuchipele.

⁴ Jesu wakati kulinguwe, “Utakambili muntu naba umwi” Ulitondezye kumupayizi, alimwi ukape chipo kuli Mozesi nchakakulayilila, kuti bukabe bukamboni kulimbabo.”

⁵ Awo Jesu nakanjila mu Kapenawuma, silutwe wempi wakaza kulinguwe, wakamulombela.

⁶ alimwi wakati, “Mwami, mubelesi wangu ulilede kungánda, uliyuminide akumvwa machise mapati.”

⁷ Jesu wakati kulinguwe, “Ndilasika alimwi ndizomuponye.”

⁸ Silutwe wankamu wakasandula alimwi wakati, “Mwami, tandeelede kuti unjile mungánda yangu pesi amba ijwi alimwi mubelesi ulapona.

⁹ Ngambulindime lubo ndili muntu usalidwe mubwendelezi, alimwi ndilabasilumamba balimunsi lyangu. Ngandati kuloyu, 'Koya' alimwi ulenda, alimwi akulumwi, ngandati, 'Sika' alimwi ngawaza, akulumbi mubelesi, ngandati, 'chita echi; alimwi ulachichita.”

¹⁰ Chindi Jesu nakamvwa ezi, wakagamba alimwi wakati kuli abo bakali kumutobela, “Nchobeni ndamwambila kuti takwe pe ngundakali ndajana ulalusyomo luli obu mu Izilayeli.

¹¹ Ndamwambila, bingi bayozwa kumbo alimwi akujwe, alimwi bayolya atebuli a Abbulahamu, Ayizeki, a Jakobo, mubwami bwakujulu.

¹² Pesi baana babaami bayotandilwa anze mumudima, chindi nikunoli kulila akuluma

ntwino.”

¹³ Jesu wakati kulinguwe, “Enda! mbuli mbuwasyoma, aboobo achichitwe kulinduwe.” Alimwi mubelesi wakapona mu hola ndilelyo.

¹⁴ Chindi Jesu nakasika mungánda ya Pita, wakabona banyinazyala a Pita kabachisidwe ntuntumanzi.

¹⁵ Jesu wakajata kuboko kwabo, mpawo ntuntumanzi yakamana mpawo bakabuka alimwi bakatalika kumukutawukila.

¹⁶ Elyo nikwakaba mangolezya bantu bakamwetela Jesu bakanjidwe amadimoni. Wakitanda myuuya mibi ajwi alimwi wakaponisya boonse bakali kuchiswa.

¹⁷ Munzila eyi zyakazuzikizigwa ezyo zyakambidwe amusinsimi Isaya, wakati, “Nguwelwakwe ubweza machise esu akunyampula malwazi esu oonse.”

¹⁸ Lino Jesu nakabona makamu kamuzungu-lukide, wakabalayilila kuti bazubukile mutala eliya lyalwizi lwa Galilaya.

¹⁹ Mpoonyawo mulembi wakasika kulinguwe alimwi wakati, “Mwiiyi, Ndiyokutobela kufumbwa nkoya.”

²⁰ Jesu wakati kulinguwe, “Bamwaba balijisi mapako, alimwi tuyuni twakujulu tulazizumbo, pesi Mwana a Muntu takwe ampalazika mutwe wakwe.”

²¹ Umwi wabasikwiiya wakati kulinguwe, “Mwami, ndizumizye saansi kuti njiinke alimwi ndikavwikke ndeende.”

²² Pesi Jesu wakati kulinguwe, “Nditobele alimwi usiye bafwide bazikkane lwabo.”

²³ Lino Jesu nakanjila mubwato, basikwiya

bakwe bakamutobela alimwi.

²⁴ Elyo kwakaba iguwo ipati mulwizi, lumwi bwato bwavumbwa amayuwe. Pesi Jesu wakali winkilila koon.

²⁵ Basikwiya bakaza kulinguwe alimwi bakamubusya, bakati, “Tugwasye, Mwami; twamba kumana kufwa!”

²⁶ Jesu wakati kulimbabo, “Nkamboonzi nomuyowa, inywe nobalusyomo lunini? Mpawo wakabuka alimwi wakawumuzya iguwo alimwi alwizi. Mpoonya kwakaba kumuuna kupati.

²⁷ Bantu bakagamba alimwi bakati, “musyobonzi wamuntu ulibobu, kuti nikuba iguwo alimwi alwizi zilamulemeka?”

²⁸ Lino Jesu nakasika kulubazu lumbi alimwi kubantu bakkala kuchisi chitegwa Gadala bantu babili bakanjidwe madimoni bakaswanana anguwe. Bakali kuzwa kuzibunda alimwi bakali abukali alubo tebakali kuyanda muntu winda munzila eyo.

²⁹ Elyo, bakoompolola bakati, “uyandaanzi kulindiswe Mwana wa Leza? Wasika okuno kuti uzotufwabye nkachitanasika chiindi chibambidwe.

³⁰ Lino sikwembela wabutanga bwangulube wakaliwo kalikucheezya, katali kule loko ambabo.

³¹ Madimoni akaliswini kukombelezya Jesu alimwi kati, “Na watutanda, tutumine kubutanga bwangulube.”

³² Jesu wakati kulimbabo, “Kamuya! Madimoni akazwa akiya mungulube, alimwi zyoonse ngulube zyakafwambana kukunkulikila mujenga zyanjila akufwida mumanzi.

³³ Abo bakali kwembela butanga bwengulube bakachija alimwi bakaya mudolopo alimwi bakamba zyoonse, kapati loko azyakachitika kumuntu wakanjidwe dimoni.

³⁴ Mpawo, Lyoonse dolopo lyakasika kuti baswanane a Jesu. Nibakamubona bakamukombelezya kuti azwe muchisi chabo.

9

¹ Jesu nakanjila mubwaato, wakazubuka, alimwi wakasika kudolopo lyakulimbaabo.

² Amubone, bata kulinguwe muntu ulebukide kaleede aabulo. Nakabona lusyomo lwabo, Jesu wakati kumuntu ulebukide, “Mwana mulombe, sungwazigwa zibi zyako zyalekelelwa.”

³ Amubone, bamwi balembi bakati kulilwabo beni,” “Imuntu oyu ulatukila.”

⁴ Nkabela Jesu wakaziba miyeeyo yabo, elyo wakati, “Nkambonzi nimuyeeya buubi mumyoyo yenu?”

⁵ Nkambo nchichili chuuba kwamba kuti, Ízibi zyanu zyalakelelwa, na kwamba kuti, Nyampuka alimwi uyende? Pesi mulelede kuziba kuti Mwana a Muntu ulanguzu ansi zyakulekelela izibi,...”Nyampuka, bweeza bulo bwako,

⁶ alimwi uyinke kungánda yako” Mpawo mwalumi wakanyampuka alimwi wakeenda kungánda yakwe.”

⁷ Mpawo mwalumi wakanyampuka alimwi wakeenda kungánda yakwe.

⁸ Chiindi makamu makamu nakabona eechi, bakayoowa alimwi bakatalika kulumbayizya Leza, wakapede inguzu ziliboobu kubantu.

⁹ Mbubonya Jesu nakayinda kuzwa awo, wakabona mwalumi utegwa Mateyo kakkede aziyako zyasimutelo wasikuti kulinguwe, “Nditobela.” Wakanyampuka alimwi wakamutobela.

¹⁰ Mbubonya Jesu wakakkala ansi kuti alye munganda, amubone, basimutelo biingi abasizibi bakasika alimwi bakasusula a Jesu abasikwiya bakwe.

¹¹ Lino baFalisi nibakachibona echi bakati kuli basikwiya bakwe, “Nkambonzi muyisi wenu ulalya abasimutelo alimwi abasizibi?”

¹² Eelyo Jesu nakamvwa echi, wakati, bantu basimide mubili tabayandi musilisi, pesi abo bachisidwe.

¹³ Mulelede kwinka akuyoyiia kuti ezi zyam-bayi. Ndilombozya luzyalu alimwi zitali zipayizyo.’ Mbulikuti ndakasika, kuti nditazoyiti balulami kuti musanduke, pesi basizibi.”

¹⁴ Eelyo basikwiya ba John bakasika kulinguwe alimwi bakati, “Nkambonzi iswe antomwe abaFalisi nitulyiimya, pesi basikwiya bako tabalyiimyi pe?”

¹⁵ Jesu wakati kuli mbabo, “Ani bana basimusa balakonzya na kulila nibachili asibwinga? Pesi mazuba ayosika elyo sibwinga nayobwezegwa kuzwa kuli mbabo, alimwi bayolyimya.

¹⁶ Takwe muntu ubika chisamo chipya atala a jansi kkulukulu, nkambo chigamba chiladeluka kuzwa kujansi, alimwi ibbanga elyo lilayindilila kukomena.

¹⁷ Nekuba kuti bantu babika wayini mupya muzibikilo zikulukulu zyewayini. Na ba-

chita boobo zibikilo zilakwamuka. Wayini ulatika alimwi zibikilo zyawayini zilanyonyonwa. Anukuti, babika wayini mupya muchibikilo chipya cha wayini, alimwi zyoonse zilalondokeka.”

¹⁸ Alimwi Jesu nakali kwamba eezi kulimbabo, amubone, mwendelezi wakasika alimwi wakkkotama aansu kulinguwe wakati, “Mwana wangu musimbi wafwa lino, pesi sika alimwi uzobike ijanza lyako alinguwe, alimwi uyopona.”

¹⁹ Mpawo Jesu wakabuka akumutobela, alimwi mbubakachita basikwiiya bakwe.

²⁰ Amubone, mwanakazi wakali kufwabisigwa akalobola kwaminyaka ili kkumi ayibili wakeza musule lya Jesu alimwi wakajata moombe wejansi lyakwe.

²¹ Nkambo wakali walyambila lwakwe mwini, “kuti na nkajate chisamo, ndiyopona.”

²² Pesi Jesu wakachebuka mpawo wakamubona, alimwi wakati, “Musimbi, koba mukozi, lusyomo lwako lwakuponya. Mpawo mwanakazi wakaona muchindi ncicheecho.

²³ Chiindi Jesu nakeza kunganda yamwendezi, wakabona bakali kusobana mutetele alimwi makamu makamu akali kuyowela.

²⁴ Wakati, “Muzwe awa, nkambo musimbi tafwide pe, pesi ulilede. “Pesi bakamuseka chakumuniaka.

²⁵ Kuchindi makamu nakazwa anze, wakanjila munganda alimwi wakamubweza akuboko, alimwi musimbi wakanyampuka.

²⁶ Makani atala azezi akazulila munyika yoonse.

²⁷ Mbubonya Jesu nakayinda kuzwa oko, bantu babili boofu bakamutobela. Bakali koompolola alimwi kabati, “Tufwide luzyalo Mwana wa Devidi.

²⁸ Chiindi Jesu nakeza mungánda. bantu boofu bakasika kulinguwe. Jesu wakati kuli mbabo, mulasyoma na kuti nga ndilachichita eechi? Bakati kuli nguwe, “Iyii, Mwami.”

²⁹ Mpawo Jesu wakajata menso abo akwamba kuti, “achichitike kulindinywe mbuli lusyomo lwenu,”

³⁰ alimwi meso abo akajulika. Mpawo Jesu wakabalayilila akwamba kuti, “mubone kuti takwe uumbi utakazibe atala azezi.”

³¹ Pesi bantu babili bakeenda biinka alimwi makani akakuzulila munyika yoonse.

³² Mbubnya bantu abo babili nibakayobwenda, muntu uutambuli kazwide muuya wadimoni wakeetwa kuli Jesu.

³³ Dimoni nilyakagwisigwa, muntu utaambuli wakaambula. Makamu makamu akagamba, akaamba kuti, “eezi tazinakuboneka mu Izilayeli!”

³⁴ Pesi ba Falisi bakali kuti, “Mubwendelezi bulama dimoni, ulagwisya dimoni.”

³⁵ Jesu wakenda kumadolopo woonse akumagunzi wakendelela anembo kayobuyiisya muzikombelo zyabo kakambawuka makani mabotu abwami, akuyobuponia zilwazi zyonse zyamisyobo misyobo amachise woonse amisyobo misyobo.

³⁶ Lino nakabona makamu makamu, wakaba aluzyalo kuli mbabo, nkambo bakali ku-

peekezezegwa akunyansigwa. Bakali mbuli mbelele zitakwe mweembeli.

³⁷ Wakati kuli basikwiiya bakwe, “Butebuzi bwavula, pesi batebuzi mbache.

³⁸ Nkabela amukombe chakufwambana ku Mwami wabutebuzi, kuchitila kuti atuume batebuzi mubutebuzi bwakwe.

10

¹ Jesu wakayita basikwiiya bakwe boonse ibali kkumi ababili alimwi wabapa inguzu aatala amyuuya mibi, kuti bayitande. Akuponia zilwazi zyamisyobo isiyene amachise amisyobo isiyene.

² Lino mazina abatumwa balikkumi ababili ngaya. Wakusanguna, Sayimoni (oyo ngwakiita kuti Pita), a Endulo mukulana; Jemusi mwana wa Zebbedi, a Joni mukulana wakwe;

³ Filipu, a Bbatolomyu; Tomasi, a Mateyo simutelo; Jemusi mwana wa Alufiyasi, a Tedyasi;

⁴ Sayimoni mu Ziloti, a Judasi Sikaliyoti, oyo wakali sikuyomwaba.

⁵ Aaba bali kkumi ababili Jesu mbakatuma wakabalayilila akwamba kuti, “Mutakayinki kunyoika kukkala bamaasi alimwi mutakanjili kufumbwa dolopo lyaba Samaliya.

⁶ Kamuya kumbelele ziswekede zyang'anda ya Izilayeli.

⁷ Alimwi nimuyoyinka, mukakambawuke akwamba kuti, “Bwami bwakujulu bwaba afwifwi.

⁸ Mukaponie bachiswa, mukabusye bafwide, musanze basizinsenda, akuyotanda madimoni. Mwatambula kakutakwe muliyo, anywebo amukape katakwe muliyo.

⁹ Mutakabwezi ingolida, nsiliva, nikuba kkopa muzibbeeke zyenu.

¹⁰ Mutakabwezi zibbeeke zyamulwendo mukwenda kwenu, nikuba zibaki zibili na insangu, na inkoli, nkambo simulimu uyolijanina chakulya.

¹¹ Kufumbwa muunzi ngumuyonjila, mukalange kuti ngwani uyelede, kuti mukkale alinguwe manedo mukeende.

¹² Mbubonya mwakunjila mung'anda, muki-ijuzye.

¹³ Kuti ing'anda kiyelela, akube kuti lumuno lwenu lukabe mulinjiyo. Pele na kitelede lumuno, lumuno lwenu ngalubwede kulindinywe.

¹⁴ Kuli abo batakabule kumutambula nikuba kumutelela kumajwi enu, nimutakazwe mung'anda na mudolopo, mukakunkumune lusuko kumawulu enu.

¹⁵ Nchooncyo ndamwambila kuti, kuyoba kulansya moyo kunyika ye Sodomu a Gomola mubuzuba bwalubeta kwinda kwamudolopo elyo.

¹⁶ Amulange, Ndamutuma mbuli imbelele akati kabawumpe, nkenkaako amuchenjele mbuli inzoka alimwi mube basalali mbuli inziba.

¹⁷ Amukabalangisisye bantu! bayomutola kumbeta alimwi bayomutanda muzikombelo zyabo.

¹⁸ Mpoonya bayomweta kunembo lyabendezi akubaami nkambo kangu, bukabe bukamboni kuli mbabo akuli bamaasi.

¹⁹ Kuchindi nibayomujata akumwaba, mutaka-

likatazyi kuti mbobuli nakuti tuyowambula katu-tyeni, nkambo izyakuyowamba muyozipegwa nywebo muchiindi echo.

²⁰ Nkambo teensi ndinywe nimuyowambula, pesi kuti Muuya wa Wuso ngutakaambule mulindinywe.

²¹ Mukwesu uyowaba munyina kulufu, alimwi wisi uyowaba mwana. Bana bayobukila bazyali baabo alimwi akuchita kuti bajayigwe.

²² Muyosuligwa abantu boonse akambo kezina lyangu. Pesi oyo ukakatila kuyosika kumanino, imuntu oyo uyofutulwa.

²³ Chindi nibayomupenzya mudolopo elyo, mukachijile kuli liimbi, nkambo zyamasimpe ndamwambila, tamukoyo yenda mukati kamadolopo a Izilayeli Mwana a Muntu katanakusika.

²⁴ Sikwiiya temupati kwiinda muiisyi wakwe, nikuba mulanda talimupati kwiinda simalelo wakwe.

²⁵ Zilelede mbuli sikwiiya kuti aabe mbuli muiisyi, alimwi mulanda mbuli simalelo wakwe. Na bayita mulanda wang'anda ya Bbeluzebbulu, zilaba kazyindilila byeni mbuli mazina ngibayita bamwi babeleki bang'anda yakwe!

²⁶ Nkinkakako mutakabayooi, mbulikuti takwe chisisikene chitakaleke kuzwa entanganana alimwi takwe chisisikene chitakaleke kuyozibinkana.

²⁷ Nzendikumubuzya mumudima, muzyambe mumumuuni, alimwi nzimumvwa kanonono mumatwi enu, mukaziluule aziluli zyamaanda.

²⁸ Mutayoowi abo bajaya, mibili pesi kabakachilwa kujaya muuya. Anukuti mwelede kuyowa oyo ukonzya kujaya muuya a nyama mugehena.

²⁹ Sena tuyuni tobile tatuulwi a kkobili? Takwe naba omwe wabo uuwa aansii katakwe luzibo lwa Wuso.

³⁰ Pesi nikuba masusu mumutwe yenu woose alibalidwe.

³¹ Mutayowi. Mulayandika kwindi tuyuni twiingi.

³² Nkinkakako kuliwoonse ulisola kulindime kunembo lyabantu, andime ndiyolisola kuli Taata ulikujulu.

³³ Pesi oyo undikkaka kunembo lyabantu, Ambebo ndiyomukkaka kunembo lya Taata uli kujulu.

³⁴ Mutayeeyi kuti ndakeza kuzoyeta lumuno ansi aano. Tindakazida kuzoyeta lumuno, pesi ikafulo.

³⁵ Mbulikuti ndakazida kuzokazyanisya mwana awisi, alakwe mwana musimbi abanyina, alakwe mukamwana abanyinazyala.

³⁶ Nkabela basinkondonyina bamwalumi mbimbabo beng'anda yakwe.

³⁷ Oyo uyanda wisi na banyina kwindi ndime-teelede kulindime, oyo uyanda mwanakwe mulombe na musimbi kwindi ndime teeleda kulindime.

³⁸ Oyo utabwezi chiingano chakwe alimwi atobelele musule lyangu teleda kulindime.

³⁹ Oyo uyanda buumi bwakwe uyobuswekelwa. Pesi oyo uswekelwa buumi bwakwe akambo kangu uyobujana.

⁴⁰ “Oyo ukutambula utambula ndime, alimwi oyo unditambula alimwi watambula ayoyo iwakandituma.

⁴¹ Oyo utambula musinsimi muzina lyamusinsiimi uyojana mpindu yamusinsiimi, alimwi oyo utambula bululami bwamuntu muzina lyabululami bwamuntu uyojana mpindu yabululami bwamuntu.

⁴² Kufumbwa uupa kulumwi wabaaba banini, nikaba kanywido kamaanzi atontola kuti banywe, nkambo ngusikwiiya, chamasimpe ndamwambila, takwepe nayobula impindu yakwe.”

11

¹ Nichakaba kuti Jesu wamaninsya kulayilila basikwiya bakwe balikkumi ababili, wakazwa nkukonya oko wakuyisya akukambawuka mumadolopo aabo.

² Lino Joni nakamvwa muntolongo atala anchito zya Kkilisito, wakatuma basikwiya bakwe

³ ajwi elyo bakati kulinguwe, “Nduwe na ulokuza, na kuti tuchilangilila uumbi?”

⁴ Jesu wakasandula akwamba kulimbabo, “Mwinke mukaambe kuli Joni nzimwabona akumvwa.

⁵ Bataboni balikutambula kubona, zilema zilenda, balezipele balokusalazigwa, batamvwi balokumvwa lubo, bafwide balokubusigwa lubo kubawumi, amakani mabotu alokukambawukwa kubachete.

⁶ Alubo ngusicholwe kufumbwa utabilizigwi andime.”

⁷ Lino aba bantu nibakeenda munzila yabo Jesu wakatalika kwamba kumakamu atala a Joni, “Mwakayinka kuya kunkanda kuyobonanzi - ityetye lizunganisigwa aguuwo?

⁸ Pesi mwakayinka kuya kuyobonanzi - muntu usamide ziteete? Mbukubede, abo basama zisamo ziteetete bakkala mumaanda abami.

⁹ Pesi mwakainka kunze kuyobonanzi - musin-simi? Iyi, ndati kulindinywe, akwinda musin-simi.

¹⁰ Echi nchenchicho nguchakali kulembeledwe obu. 'Bona, ndinokutuma mutumwa wangu kunembo lyabushu bwako, uyokubambila nzila kunembo lyako.

¹¹ “Ndamba kulindinye nkasimpe, takukwe nikwakabukide akati kabaabo bazyalwa abanakazi unga ulaba mupati kwindi Joni mubbabbatiziyi. Nekubaboobo, munini muntu mukolondo kubwami bwakujulu mupati kwindi nguwe.

¹² Kuzwa kumazuba a Joni mubbabbatiziyi kusikila lino, bwami bwakujulubulu lokufwabisigwa alupyopyongano, lino bantu balupyopyongana balalubweza changuzu.

¹³ Mbukunga boonse basinsimi amulawu wakali kusinsima kusikila kuli Joni.

¹⁴ Elyo nawayanda kuzumina kuchitambula, oyu ngu Elija, nguwe wakali kuzosika.

¹⁵ Kuliyoyo ulamatwi akumvwa, ngamvwe.

¹⁶ Kuli chili nchindinga ndilayezyanisya azyalane lyasunu? Chili mbuli bana basobana kuchisambalilo, bakkala akwita umwi awumwi,

¹⁷ akwamba, 'twakakulizizya muteetele,

aboobo tewakazyana pe. Twakayeema, pele tewakalila.

¹⁸ Aboobo Joni wakasika katalyi chinkwa nanka kunywa masansa, elyo bakati, Uladimoni.

¹⁹ Mwana amuntu wakasika akulya akunywa elyo bakati, Langa, mwalumi sindya amukolwi, muzolwani abasimutelo abasizibi! Pesi busongo bulalulamikwa anchito zyakwe.”

²⁰ Elyo Jesu wakatalika kukalalila madolopo omo mwakachita malele akwe manji, nkambo tebakeempwa.

²¹ “Maawe kulinduwe, Kkolazini! Mawe kulinduwe, Bbetisayida! Kansinga malele akachitwa ku Taya a Sidoni akachitwa kulindinywe, ninga bakeempwa kale kuchindi chakayinda muzisamo zymasaka amudyota.

²² Pesi kulakuyandika chakwindilila kubuzuba bwalubeta kwindi nduwe.

²³ Webu, Kapenawumu, uyeeya kuti uzo-sumpulwa kujulu? Peepe, unoyoyetwa ansi kumulindi utagoli [Hadesi]. Nikwali kuti mu Sodomu mwakachitwa malele akachitwa mulin-duwe, ninga mwachili asunu.

²⁴ Pele ndati kulinduwe chiyobachubila kunyika ya Sodomu mubuzuba bwalubeta kwindi nduwe.”

²⁵ Kuchindi echo Jesu wakati, “Ndilikutembawula Taata, Mwami, wakujulu anyika, nkambo wasisila basongo abamvwisya, akuyubunwida bana banini:

²⁶ Iyii, Taata, Eechi chalikubotezya kumeso ako.

²⁷ Zintu zyonse zyakapegwa ndime kuzwa kuli

Taata. Elyo takwe umwi uzi mwana kunze kwa Taata, mpawo, takwe uzi Taata kunze kwamwana aboobo kuloyo mwana ngwasala kuti amuyubunune.

²⁸ Amuze kulindime, moonse nimukatede animulemenwa ndiyomupa kulyokezya.

²⁹ Amubweze ijokwe lyangu lili alindime akwiya kulindime, nkambo ndilimubombe akuba mutete moyo, eelyo muyojana kulyokezya kwmyuuya yanu.

³⁰ Nkambo ijokwe lyangu niteete alubo ndiguba amukuli wangu tulemi pe.”

12

¹ Kuchindi echo Jesu wakayinka mubuzuba bwakulyokezya wayinda mumyunda yazilyo. Basikwiya bakwe bakafwa anzala eelyo bakasangua kukulula mayila nkwalikumpela akwalya mituutu.

² Pesi baFalisi nibakabona oobo bakati kuli Jesu, “Bona, basikwiya bako bachita zitali mulawu kuchitwa mubuzuba bwakulyokezya.”

³ Pesi Jesu wakati kulimbabo, “Takwe nimwakabalide Devidi mbakachita nakaba anzala, abaabo balumi mbakali aabo?”

⁴ Wakanjila munganda ya-Leza akulya chinkwa chakutwa, chitensi kumulawu kuti alye alubo chitali kumulawu akulabo mbakali abo, pesi kazili kumuawu kupela kubapayizi.

⁵ Tamubalide mulawu kuti mubuzuba bwakulyokezya bapayizi muchikombelo balataluka mulawu wabuzuba bwakulyokezya pesi tabakwe mulandu?

⁶ Pele ndati kulindinywe umwi mupati kwinda ngánda yaLeza ulaano.

⁷ Namwakalizi echi nchichalikwamba, 'mebo ndiyanda luse pepe chipayizyo; temwalikubapa kambo batakwe mulandu.

⁸ Eelyo mwana amuntu ngu Mwami wazuba lyakulyokezya."

⁹ Mpawo Jesu wakazwa oko akwinka kuchikombelo.

¹⁰ Amubone, kwakali muntu wakalinyanide kuboko. Bafalisi bakabuzya Jesu, bakati, "sena chililuleme kusikila mubuzuba bwakulyokezya?" Ikuti bamutamikizye kubisya.

¹¹ Jesu wakati kulimbabo, "Inga ulaba mwalumi biyeni akati kanu, ngwani, na wali ambelele imwi, aboobo, na imbelele eyi yawida mudindi mubuzuba bwakulyokezya, takonga ulijata na akwigusya aanze?

¹² Chiinda bulemu biyeni, eelyo kumuntu nekuba kumbelele! Aboobo chililuleme kuchita chibotu mubuzuba bwakulyokezya."

¹³ Mpawo Jesu wakati kumuntu, "Tandabika kuboko kwako." Wakatandabika, alubo lwakabwedezegwa mukupona, mbuli kwenzinyina kuboko.

¹⁴ Pesi ba Falisi bakayinka bakubamba mbubonya kabalikumuvwiya. Bakali kuyandula mbubanga balamujaya.

¹⁵ Mbuli mbwakaziba Jesu, wakazwa oko. Bantu banji bakamutobela, lino wakabasilika boonse.

¹⁶ Wakabalayilila kuti batachiti kuti azibinkane kulibamwi,

¹⁷ zikazuzikizigwe, zyakambwa muli Isaya

musinsimi, kuti,

¹⁸ “Bona, mulanda wangu ngundakasala; Muyandwi wangu umwi, oyo muuya wangu ngundibotelwa. Ndiyobika muuya wangu alinguwe, eelyo uyobakambawukila bululami kulibamasi.

¹⁹ Takoyojana buyumuyumu na kukulililisya; nikuba umwi kumumvwa ijwi lyakwe mumigwagwa.

²⁰ Takwe nayotyola limwi ityetye lyakapwayulwa; takwepe nayozima kamuni kasuka kamulilo, kusikila wendelezya bululami mukuzunda,

²¹ Abalabo bamasi bayoba bulangizi muzina lyakwe.”

²² Eelyo umwi muntu utakuboni katambuli, wakanjidwe adimoni, wakeetwa kuli Jesu. Wakamusilika, azezyo zyakazwa kuti utambuli muntu wambula akubona.

²³ Makamu wonse akagamba akwamba, “ooyu muntu ngaulaba mwana wa Devidi na?”

²⁴ Pesi baFalisi nibakamvwa malele aaya bakati, “Ooyu muntu tatandi madimoni kunze kwa Bbelezebbulu, mupati wamadimoni.”

²⁵ Pele Jesu walizi miyeyo yabo mpawo wakati kulimbabo, “Bwami boonse bukazyania lwabo, buyomwayisigwa, alubo kufumbwa dolopo niba ng'anda ikazyania lwayo tikayimikili pe.

²⁶ Ikuti satani watanda satani, unoli ulikulikazya lwakwe. Bwami bwakwe nga bulimikila byeni?

²⁷ Lino na ndilatanda madimoni a Bbelizebbulu, ani batobezi banu batandyanzi? Nkambo

kachechi, bayoba babetesi banu.

²⁸ Pesi do katwatanda madimoni a muuya wa Leza, mpawo bwami bwa Leza bwasika akati alindinywe?

²⁹ Alubo kulibiyeni kuti umwi anjile mung'anda yamuntu usimide akubba makwebo akwe katamusungide muntu usimide chakusanguna? Elyo uyobba makwebo akwe kuzwa mung'anda yakwe.

³⁰ Umwi utali andime ukazyanya andime, alubo ayoyo utabungani andime ulamwayula.

³¹ Aboobo ndati kulinduwe, chibi choonse akusampawuula bantu bayolekelelwa, pesi kutukila muuya takukwe kulekelelwa pe.

³² Kufumbwa uwambula ijwi atala amwana muntu, ooyo uyolekelelwa. Pesi kufumbwa uwambula bubi atala a Muuya Uusalala, oyo takoyolekelelwa, na munyika eyi, na kuleeyo ichizosika.

³³ Chita musamu ubote ayala michelo yawo ibote, na kuchita musamu kuba mubi, amuchelo wayo ubije, mbuli kuti musamu uboneka amichelo yawo.

³⁴ Nywebo nubana banzoka, mbomunga muli babi, ngamulamba buti izintu zibotu? Kuzwa mumoyo mulizinji mulomo nzuwambula.

³⁵ Muntu mubotu kuzwa kuzintu zibotu zyamoyo wakwe ulagusya nzizyonya, pele muntu mubi wakuzintu zibi zyamoyo wakwe mulazwa bubi kupela.

³⁶ Ndati kulinduwe mubuzuba bwalubeta bantu balakupa bupandanuzi kuli alimwi ijwi litali kabotu ndibakaamba.

³⁷ Kuzwa kumajwi ako uyolulamikwa, akumajwi ako uyopegwa mulandu.”

³⁸ Elyo balembi bamulawu bamwi, abaFalisi bakasandula akut, “Muyiisi tuyanda kubona chitondezyo kuzwa kulinduwe.”

³⁹ Pesi Jesu wakasandula akuti kulimbabo, kufumbwa bubi abumambi kuzukulu lyasunu lyabayandula chitondezyo. Pesi tokwe chitondezyo pe chiopegwa kunze kwachitondezyo cha Jona musinsiimi.

⁴⁰ Mbanga Jona wakali amazuba atatu mubula bwamuswi mupati, alakwe Mwana Muntu uyoba amazuba atatu amansiku atatu mumoyo wanyika.

⁴¹ Bantu baku Ninivu bayoyimikila kunembo lyalubeta azukulu eli lyabantu aboobo liyopegwa mulandu. Nkambo bakeempwa mukukambawuka kwa Jona, lino amubone, umwi mupati kwindi Jona uli aano.

⁴² Mwami mwanakazi wakumusama uyobuka kulubeta abantu bakwe bazukulu eli lyabantu akulipa mulandu. Wakazwa kumajinkilo anyika kuti azomvwe busongo bwa Solomoni, alubo bona, umwi mupati kwindi Solomoni ulaano.

⁴³ Na muuya mubi wazwa kumuntu, wakwindi mukati kamasena atakwe maanzi akuyandula kulyokezya, pesi tawubujani pe.

⁴⁴ Mpawo lyakat, “Ndiyobweda kung’anda yangu nkundakazwa; Nilyakabwed, lyakujana ng’anda eyo yakakukulwa akubambwa obotu.

⁴⁵ Elyo lilayinka akubweza bweza imbi myuuya ili musanu ayibili mibi kwindi nguwo, lino ilasika kuzokkala omo. Abobo bubi bwamuntu

kumamanino bwakabisisisya kwinda kumatalikilo. Mbukuyoba mbubobo kuzukulu lyabubi eli.”

⁴⁶ Nakachili kwambula Jesu kumakamu-makamu, amubone, banyina abakulana bakwe bakayimikila aanze, kabayandula kuti bambule anguwe,

⁴⁷ Umwi wakati kulinguwe, “Bona banyoko abanike bako balimvwi aanze bayanda kwambula anduwe.”

⁴⁸ Pesi Jesu wakasandula kuliyoyo wakamwambila, “Mbani baama bangu alubo mbaani banike bangu?”

⁴⁹ Eelyo wakatandabika kuboko kwakwe akutondeka basikwiya bakwe mpawo wakati, “Bona, mbabo baama abanike bangu!”

⁵⁰ Nkambo kufumbwa uchita luyando lwa Taata ulikujulu, muntu oyo mukulana wangu, muchizi wangu, mbebaaba bangu.”

13

¹ Mubuzuba obo Jesu wakazwa aanze ang'anda akukkala ambali alwizi.

² Inkamu mpati yakamubunganina achakumuzyunguluka, lino wakanjila mubwato akukkala mukati, inkamu yoonse niyakachimvwi kunkomwe.

³ Elyo wakamba zintu zyiingi kulimbabo muzikozyanio. Wakati, “Amubone, mulimi wakaya kunze kukuyobyala imbuto.

⁴ Nakayobubyala, Imwi imbuto zyakawida ambali lyamugwagwa, mpawo bayuni bakasika akuzilya.

⁵ Imwi imbuto yakawida anyika ilamabwe, kwakati kwakatali muse mwingi. Mpawo mpawo zyakamena nkambo imuse tewakali abulamfu kukuyaansi.

⁶ Pesi izuba nilyakatenta, zyakawuumpwa, nkambo tezyakali amiyanda, aboobo zyakayuma.

⁷ Imbuto zimwi zyakawida mumaamvwa. Maamvwa akakomena mpawo akazisyanikizya.

⁸ Zimwi imbuto zyakawida mumuse mubotu mpawo zyakazyala zilyo, zimwi mwanda umwi windulwidwe chakuvula, zimwi makumi musanu alimwi, mpawo zimwi makumi aatatu.

⁹ Ooyo ulamatwi muleke amvwe.”

¹⁰ Basikwiya bakasika mpawo bakati kuli Jesu, “Nkambonzi nowambula makani aya muzikozyanio?”

¹¹ Jesu wakasandula akwamba kuti kuli mbabo, “mulipedwe mwenya wakumvwisisya zisisidwe zyabwami bwakujulu, pesi kulimbabo tabapedwe pe.

¹² Nkambo kufumbwa ujisi uyopegwa zyingi, alimwi uyoba azyindilide zyingi. Pesi utakwe, nekuba anchalacho chiyobwezegwa kuzwa kulinguwe.

¹³ Nchenchicho nchingambulaabo muzikozyanio: nekuba banokubona, pesi tababonesesyi pe; alubo nekuba balamvwa, pesi tabamvwisisisiyi, nekuba kumvwisisisiya.

¹⁴ Kulimbabo chisinsimicha Isaya chili zuzikizizigwe, echo chamba kuti, “Nekuba kumvwa mulamvwa, pesi takwe abunini nimuyomvwisisiya; nekuba kubona muyobona, pesi takwepe

nimuyobonesesya.

¹⁵ Nkambo myoyo yabantu aaba yaba mifubafuba mpawo miyumu kukumvwa, alubo bakajala meso aabo, kuti bataboni ameso aabo, nekuba kumvwa amatwi aabo, nikuba kumvwi-sisisya amyoyo yabo, kuti basanduke lubo, alubo ndikabaponesye.'

¹⁶ Pesi alongezegwe meso anu, nkambo alabona.

¹⁷ Nkasimpe ndati kulindinywe kuti basin-simi bayingi abantu baluleme bakayandisya kubona zintu ezyo nzimubona pesi tebakazibona. Bakayandisya kuzimvwa zintu nzimuvwa alimwi tebakazimvwa.

¹⁸ Lino ngamuswilile kuchikozyanyo chamulimi wakabyala imbutozyakwe.

¹⁹ Na umwi wamvwa ijwi lyabwami bwakujulu pesi talimvwisisisya, mubi umwi wasika akubweza chakabyalwa mumoyo wakwe. Eyi nimbuto yakabyalilwa ambali lyamugwagwa.

²⁰ Chakabyalwa anyika ilamabwe muntu umvwa ijwi elyo mpawo mpawo wakalitambula akukondwa,

²¹ nekubabobo takwe miyanda mulinguwe nkambo mpawo ulakakatila chabunini. Nikuba makatazyo akupenzegwa kaabuka ankambo kaji, ulafwambana kuwa.

²² Chakabyalwa mumuse ulamamvwa, oyu muntu umvwa ijwi, pesi misaalo yenyika abon-gelezyi bwabuvubi bwasyanikizya ijwi, elyo ulaba utachizyali michelo.

²³ Imbuto yakaminzwa mumuse mubotu, ooyu muntu uumvwa ijwi akulimvwisisisya. Ulazyala

michelo akuleta zilyo, kakutebulwa uumwi myanda, amuli umwi makumi musanu alimwi, amuli umwi makumi aatatu akayindululwa mbubonya mbozyakabyalwa.

²⁴ Jesu wakababikila chimbi chikozyanyo kuli mbabo. Wakati, “Bwami bwakujulu bulimbuli mwalumi wakabyala imbuto imbotu mumuunda wakwe.

²⁵ Pesi ibantu nibakachili koona, sinkondonyina wakasika elyo mpawo wakabyala masokwe akati ka wiiti mpawo wakiinka.

²⁶ Mpawo masoonso nakazwa akuzyala bana balamuseke, aboobo isokwe lyakaboneka alyalo.

²⁷ Babelesi bamukamuunda nibakasika mpawo bakati kulinguwe, 'Taa,' temwakabyala imbuto mbotu na mumuunda wenu? Nkambonzi nikwaba masokwe?'

²⁸ Wakati kulimbabo, 'Sinkondoma nguwakachita echi.' Babelesi bakati kulinguwe, 'Mpo mulayanda na kuti twinke tukazinonkole?'

²⁹ Mwini muunda wakati, 'Pee. Nkambo mwanoli kamunonkola masokwe, ngamuyononkokezya a wiiti.

³⁰ Muleke zikule antomwe kusikila kukutebula. Elyo kuchiindi chakutebula ndizoti kubatebuzi, “Chakusanguna amunonkoole masokwe akwawanga misunta kuti akawumpwe, pesi mubunganisye wiiti mubutala bwangu.”

³¹ Elyo Jesu wakabika chikozyanisyo chiimbi kulimbaabo. Wakati, “Bwami bwakujulu buli mbuli inseeke yalubangulamuntu njakabweza akwiibyala mumuunda wakwe.

³² Inseke eyi nindini loko kunseke zyoonse.

Pesi na yakomena, inga yabampati kwindi misamu yamuchilili. Ngayakomena kwindi ziziki zyamuchilili, ngayaba musamu wakuti bayuni bawuluka basike akuyaka zizumbo mumitabi yayo?”

³³ Alimwi Jesu wakabambila chimbi chikozyanyo. “Bwami bwakujulu buli mbuli bumena bwamwanakazi bwakabweza akuswanizya zimpanzi zitaatu zyabusu bwa wiiti kusikila zyafufumuka.”

³⁴ Zyoonse ezi zintu Jesu wakazyamba muzikozyanio kumakamu; aboobo takwe nchakamba katambide muchikozyanio.

³⁵ Echi chakalibobo kuchitila kuti chakambwa kwindi mumusinsimi chizuzikizigwe, Awo mpakamba kuti, “Ndiyojula mulomo muzikozyanisyo. Ndiyowamba zintu zyakasisikene kuzwa kumatangunino anyika..”

³⁶ Jesu wakasiya makamu makamu akuya munganda. Basikwiya bakwe bakeza kulinguwe akwamba kuti, “Tupandulwide chikozyanio chamasokwe amumuunda.”

³⁷ Jesu wakabasandula wamba elyo wakati, “Ooyo ubyala imbuto mbotu Mwana a Muntu.

³⁸ Muunda ninyika; mpawo imbuto mbotu, aba mbana baLeza bamubwami. Imasokwe mbana bamubi umwi.

³⁹ Lino sinkondo wakabyala ngudyabulosi. Butebuzi ngimamanino achiindi, mpawo batebuzi mbaangelo.

⁴⁰ Nkinkako mbuli masokwe mbabunganigwa akuumpwa amulilo, aboobo mbukuyooba kumanino achiindi.

⁴¹ Mwana amuntu uyotuma baangelo bakwe,

elyo bayobunganisya aanze abwami bwakwe zintu zyoonse zyakali kuchita kuti kube ababo bakachita zitelede.

⁴² Bayobawalila mumabanga banga amulilo, nkubanolli kabakwila akuyoluma intwino.

⁴³ Elyo kuyoba bantu balume kabamweka mbuli zuba mubwami bwa Wisi. Ulamatwi, ngamvwe

⁴⁴ Ibwami bwakujulu buli mbuli buvubi busisidwe mumuunda. Muntu wakabona akubusisa. Mukukondwa kwakwe wakinka, wakawuzya zintu zyoonse nzyakali azyo, akuyowula munda oyo.

⁴⁵ Alubo, Bwami bwakujulu bulimbuli muntu musambali uyandula ngale imbotu.

⁴⁶ Nakijana imwi ngale imbotu, wakeenda akuzya zyoonse nzyakalazyo zintu akuyoyiwula.

⁴⁷ Alubo bwami bwakujulu buli mbuli kazamba kakawalwa mulwizi, mpawo kabungania baswi bamisyobo yoonse.

⁴⁸ Nikakazula, bazubi bakakabweza, bazubi bakakakwelela aanze kunkomwe. Elyo bakakkala ansi akubungania imbotu muzibikilo, pesi zyakatali kabotu bakazisowa.

⁴⁹ Kuyoba obo kumamanino achindi. Baangelo bayosika akuyowandanya babi kuzwa kubaluleme.

⁵⁰ Bayobawalila mumabangabanga oko nkubayokwila akuyoluma intwino zyameno.

⁵¹ “Mwazimvwa na zintu eezi zyoonse?” Basikwiiya bakati kulinguwe, “Iyii.”

⁵² Mpawo Jesu wakamba kuti kulimbabo, “Aboobo woonse mulembi wamulawu waba

sikwiya kubwami bwakujulu ulimbuli muntu mwininganda, ugwisya aanze zintu zyakwe zikulukulu ezipya kuzwa muzibikilo zyakwe.”

⁵³ Abobo nichakaba kuti Jesu wamaninsya zikozyanio ezi, wakazwa kubusena oobo.

⁵⁴ Eelyo Jesu nakanjila kuchisi chakwe akuyi- isya bantu muchikombelo chabo. Chakazwa chakuti bakagamba akwamba kuti, “Muntu oyu ubujana kuli busongo bwakwe anguzu zya- malele aaya?

⁵⁵ Oyu muntu teensi mwana wamubezi na? Sena banyina tabitwi kuti Meli? Sena bana bakwabo tabali ba Jemusi, Jozefu, Sayimoni a Judasi?

⁵⁶ Sena bachizi bakwe, tabali akkati kesu? Uzijana kuli zintu zyoonse ezi?”

⁵⁷ Bakalimvwa kabali amulandu anguwe. Pesi Jesu wakati kulimbabo, “Musinsimi takwe bulemu kunze akuchisi chakulimbabo amumpuli yakwe.”

⁵⁸ Alubo takwe pe nakachita malele miingi nkuko akambo kakutamusyoma kwabo.

14

¹ Kuchindi echo, Mwami Helodi watamvwa makani atala a Jesu.

² Wakamba kuti kubazike bakwe, “ooyu ngu Joni mubbabbatizyi; wabuka kuzwa kubafu. Nkinkaako nguzu eezi zilikubeleka mulinguwe.”

³ Nkambo Helodi wakali wajata Joni, wamwanga akumubika muntolongo nkambo ka Helodiyasi, mukamwanike wakwe Filipu.

⁴ Nkambo Joni wakambide kuti kulingu, “Tachili mumulawu pe kuti umukwate.”

⁵ Helodi wakali kukonzya kumujaya pesi wakayoowa bantu, nkambo bakali kumuyeyela kuti musinsiimi.

⁶ Pesi buzuba bwakuzyalwa kwa Helodi nibwakasika, mwana musimbi wa Helodiyasi wakazyana aakati kabo akubotezya Helodi.

⁷ Mukusandula wakasyomezya aachikonke chakuti uyomupa kufumbwa nchayokumbila.

⁸ Musule akulayililwa abanyina, wakamba kuti, “Mundipe aano, mundyido, mutwe wa Joni mu Bbabbatizyi.”

⁹ Mwami wakawusa kuchikumbizyo chakwe, pesi nkambo kachikonke chakwe alimwi akambo kabaabo mbakali kususula aabo, wakalayilila kuti kuchitwobo.

¹⁰ Wakatumina kuyodunsulwa kwamutwe wa Joni muntolongu.

¹¹ Mpawo mutwe wakwe wakaletwa mundyido akupegwa kumwana musimbi oyo wakutola kuli banyina.

¹² Mpawo basikwiya bakwe bakasika, babweza mutunta akuyowuzikka. Kwindi kwachechi, bakiinka akuyowambila Jesu.

¹³ Lino Jesu nakamvwa eechi, wakazwa mpawo awo, wakunjila mubwato kubusena buli kumbali. Makamu nakamvwa aanchicho, akamutobela amawulu kuzwa kumyunzi.

¹⁴ Mpawo Jesu wakasika musule lyabo akubona makamu mapati. Wakabaluzyalu kulimbabo eelyo wakaponya bachiswa babo.

¹⁵ Nilyakaba goko, basikwiya bakasika

kulinguwe akwamba kuti, “Oobu busena mbwankanda, alimwi chiindi chamana. Mwayisya makamu kuti bayinke kumyuunzi mpawo bakalyulile chakulya kwabo.”

¹⁶ Lino Jesu wakabambila kuti, “Tabelede kumwayika. Amubape chimwi nchibatalye.”

¹⁷ Bakamba kuti kulinguwe, “Aano tuli aazinkwa zili musanu biyo ansuii zyobile.

¹⁸ Jesu wakati, “Amuzilete kulindime.”

¹⁹ Mpawo Jesu wakalayilila makamu abantu kuti akkale aansu mubwizu. Wakabweza zinkwa zili musanu ansuii zyobile. Walanga kujulu, wazilongezya akukwamuna zinkwa mpawo wazipa kuli basikwiya, alimwi basikwiiya bakapa makamu.

²⁰ Boonse bakalya akukkuta. Mpawo bakabwezelela bufwefwelenga bwakachaala bwechakulya - nsangwa zizwide zili kkumi azibili.

²¹ Aabo bakalya bakali zyuulu zili musanu zyabaalumi, kutaamba abanakazi abaana.

²² Mpawo mpawo wakachita kuti basikwiya banjile mubwaato akwinka kunembo lyakwe kuli bumwi busena, mbubonya mbwakachili kumwayisya makamu makamu.

²³ Nakamana kumwayisya makamu, wakatanta achilundu kuyokoomba. Nilyakaba goko wakali aalikke.

²⁴ Pesi lino bwato bwakali bwabakule aanyika. Kabuchundwa amayuwe, nkambo muuwo wakali kuunga kuubakachizya.

²⁵ Muchiindi chane mansiku Jesu wakabasikila, keenda aatala aalwizi.

²⁶ Basikwiya nibakamubona kayobwenda ataala alwizi, bakakatazika akwamba kuti, “Musangu,” mpawo bakalila chakuyowa.

²⁷ Pesi Jesu wakaamba kuli mbabo aawo akuti, “Amube bakozi ndime! Mutayowi.”

²⁸ Pita wakamusandula akwamba kuti, “Mwami, na nduwe, ndilayilile kuti ndize kulinduwe atala amanzi.”

²⁹ Jesu wakati, “Kweza.” Mpawo Pita wakazwa mubwato akweenda aatala amanzi kayinka kuli Jesu.

³⁰ Pesi Pita nakabona muuwo mupati, wakay-oowa. Mbwakatalika kubbila biyo, wakalila akwamba kuti, “Mwami ndifutule.”

³¹ Mpawo mpawo Jesu wakatandabika kuboko kwakwe, wajata Pita, akwamba kuti kulinguwe, “Nusilusomo luniini, nkambonzi nodoneeka?”

³² Mpawo Jesu aa Pita nibakanjila mubwato, muuwo wakiimikila kuunga.

³³ Mpawo basikwiya bakali mubwato bakakomba Jesu akwaamba kuti, “Nkasimpe uli Mwana wa Leza.”

³⁴ Nibakazubuka bakasika kunyika yaku Gene-saleti.

³⁵ Bantu bakubusena oobo nibakaziba kuti ngu Jesu, bakatumina makani konse muchisi choonse chizungulukide, alimwi bakaleta kulinguwe woonse wakali kuchiswa.

³⁶ Bakamukumbila kuti bajate moombe wajansi lyakwe, alimwi biingi bakuujata bakapona.

15

¹ Mpawo bamwi ba Falisi abalembi bakasika kuli Jesu kabazwa ku Jelusalema. Bakaamba

kuti,

² “Nkamboonzi basikwiya bako nibakazyania aziyanza zyabapati? Nkambo tabasambi pe mumaboko nibalya chinkwa.”

³ Wakasandula akwamba kuti kulimbabo, “Alimwi nywebo - nkambonzi nimukazyania amulawu wa Leza nkambo kaziyanza zyanu?”

⁴ Nkambo Leza wakamba kuti, “Lemeka wuso abanyoko, alimwi ooyo wambula bubi kuli wisi na banyina nkasimpe uyoofwa.

⁵ Pesi mwamba kuti, kufumbwa lugwasyon-dunoli watambula kuzwa kuli ndime lino nchipo chipegwa kuli Leza,”

⁶ Ooyo muntu telede kulemeka wisi. Munzila eyi mwawubula ijwi lya Leza. Malembe mabotu aachindi ali aajwi lya Leza aamwi malembe aachindi ali aamulawu. Nkuyumu kusalula chibalo chibotu. Nkambo kachiyanza chenu.

⁷ Nywebo nobasikuwupawupa! Isaya waka-chita kabotu nakasinsiima aatala andinywe nakamba kuti,

⁸ 'Bantu aba balandilemya amilomo yabo, pesi myoyo yabo ilikule andime.

⁹ Balandikomba chabuyo, nkambo balayiisya milawo yabantu mbuli njiisyo zyabo.”

¹⁰ Mpawo wakiita makamu kulinguwe mwini akwamba kuti kuli mbabo, “Amuswilile akumvwisya -

¹¹ Tachiwo chinjila mukanwa chisofwazya muntu. Pesi echo chizwa mukanwa, eechi ncheenchicho chisofwazya muntu.”

¹² Mpawo basikwiya bakasika akwamba kuti kuli Jesu, “Ulizi na kuti ba Falisi bakalebwa

nibakamvwa makani aaya?”

¹³ Jesu wakasandula akwamba kuti, “Zizikki zyoonse ezyo Taata wakujulu nzyakatazikila ziy-ononkolwa.

¹⁴ Amubaleke aabalike, mbeenzyi boofu. Na moofu weenzya moofunyina, boonse bayowida mukkomba.”

¹⁵ Pita wakasandula akwamba kuti kuli Jesu, “Pandulula kalabiko aaka kulindiswe.”

¹⁶ Jesu wakaamba kuti, “Anywebo aambuli sunu tamumvwisisyi na?

¹⁷ Tamumvwisisyi na kuti kufumbwa echo chinjila mukanwa chilayinda mwida mpawo chilazwa aanze mpawo chilasowegwa mukkomba?

¹⁸ Pesi izintu ezyo zizwa mukanwa zilazwa mumoyo. Nenzizyo ezyo zisofwazya muntu.

¹⁹ Nkambo kumoyo kulazwa miyeyo mibi, bujayi, bumambi, bwamu, kubba, bukamboni bwakubeja, akulengelela.

²⁰ Eezi nenzizyo eezyo zisofwazya muntu. Pesi kulya amaboko atasambie pe takusofwazyi muntu pe.”

²¹ Mpawo kuzwa awo Jesu wakazwa ooko akwinka kuzisi zyakumyunzi yaku Taya aku Sidoni.

²² Amubone, mwanakazi mu Kkenani wakazwa kuchisi echo. Wakoompolola akwamba kuti, “Ndifwide luzyalo, Mwami, Mwana wa Devidi! Mwana wangu musimbi ulijisi loko dimoni.

²³ Pesi Jesu taakwe jwi ndyakamusandula pe. Basikwiiya bakwe bakeza akumukum-bila, bakati, “Mutande, nkambo uli koompolola

musule lyesu.”

²⁴ Pesi Jesu wakasandula akwamba kuti, “Nsi-tumidwe nikuba kuli umwi pesi kumbelele ziswekede zyakungánda ya Izilayeli.”

²⁵ Pesi wakeza akuvundama aansu kunembo lyakwe, wati, “Mwami, ndigwasye.”

²⁶ Wakasandula akwamba kuti, “Tachili kabotu pe kubweza chinkwa chabana akuchisowela tunkala.”

²⁷ Wakati, “Mbukubede, Mwami, pesi aatulato tunkala tulalya tumwi twatufwefwelenga ooto tuuwa kumatebule abasimalelo aato.”

²⁸ Mpawo Jesu wakasandula akwamba kuti kulinguwe, “Yo mwanakazi, lusyomo lwako ndupati; akuchitwe kulinduwe mbubonya mbuli mboyanda.” Mwana wakwe musimbi wakaponesegwa kuzwa kuchindi echo.

²⁹ Jesu wakazwa kubusena oobo akwinka kumbali aalwizi lwaku Galili. Mpawo wakatanta akukkala nkuko.

³⁰ Makamu makamu abantu mapati akeza kulinguwe. Bakaza abalema, boofu, basy-ataambi, abantu batyokede, abamwi bayingi bakali kuchiswa. Bakababika kumawulu aa Jesu, mpawo wakabasilika.

³¹ Eelyo makamu makamu akagamba nakabona bantu batambuli kabambula, batyokede kababakabotu, balemene kabeenda, aboofu kababona. Bakalumbayizya Leza wa Izilayeli.

³² Jesu wakaiita basikwiya bakwe akwamba kuti, “Ndafwaluzyalo kumakamu nkambo bakkala aandime kwamazuba ataatu kale mpawo tabakwe achakulya. Tandiyandi

kubamwayisya kabatalyide, nkambo ngabayowizuka munzila.”

³³ Basikwiya bakati kulinguwe, “Nkukuli nkotunga tulajana zinkwa zizulila kubusena bwankanda buliboobu kuti zikkutye makamu makamu mapati aalibobu?”

³⁴ Jesu wakati, “Mujisi zinkwa zyingane?” Bakati, “musanu azibili, atuswi tuchebiyo.”

³⁵ Mpawo Jesu wakalayilila makamu kuti akkale aansii aanyika.

³⁶ Wakabweza zinkwa zili musanu azibili ansui, mpawo nakamana kulumba, wakakwamuna zinkwa akuzipa kuli basikwiya.

³⁷ Basikwiya bakazipa kumakamu. Bantu boonse bakalya mpawo bakakkuta. Mpawo bakabunganisya nsangwa zili musanu azibili ziyabu fwefwelenga bwakachaala.

³⁸ Aabo bakazilya bakali zyuulu zyone zyabaa-lumi, kutabala abanakazi abaana.

³⁹ Mpawo Jesu wakamwayisya makamu makamu abantu akunjila mubwato mpawo wakaya kuchisi chaku Magadani.

16

¹ Ba Falisi aba Sadusi bakeza mpawo bamusunka akumubuzya kuti abatondezye chiton-dezyo chizwa kujulu.

² Pesi wakasandula akwamba kuti kuli mbabo, “Nikwasiya, mwamba kuti, ‘Kuyoba kunze kubotu, nkambo ijulu lilasalala.’”

³ Nikuba chifuma, mwamba kuti, ‘Kunze kunoli kubi, nkambo ijulu lilasalala alimwi lilivumbidwe. Mulizi kupandulula bwime

bwakujulu, pesi tamukonzyi kupandulula zitondezyo zyazyiindi.

⁴ Izyalane ibbi abwamu lilangula chitondezyo, pesi takwe chitondezyo chiyopegwa kulindilyo kutaamba chitondezyo cha Jona.” Mpawo, Jesu wakabasiya akutozya kumbi.

⁵ Basikwiya nibakasika mutala, bakalubide kubweza chinkwa.

⁶ Jesu wakati kulimbabo, “Amubone akuchenjela kubumena bwaba Falisi aba Sadusi.”

⁷ Elyo basikwiya bakabuziyanya akwamba kuti, nkambo tetwabweza pe chinkwa.”

⁸ Jesu wakaziba achechi mpawo wakati, “Nywebo nubasilusyomo lunini, nkambonzi mulabuziyania lwanu mpawo mulati nkambo tetwabweza pe chinkwa?

⁹ Tamuna kuziba na kwibaluka zinkwa zili musanu kulibali zyuulu zili musanu, alimwi kuti mwakabungika nsangwa zyangane?

¹⁰ Na zinkwa zili musanu aazibili kuzyuulu zine, alimwi kuti ninsangwa zyangane nzimwakabungika?

¹¹ Ino nkambonzi kuti tamumvwisisyi kuti tendakalikwamba kulindinywe aatala achinkwa? Aamubone akuchenjela kubumena bwaba Falisi aba Sadusi.”

¹² Mpawo bakamvwisya kuti takali kubambila kuti bachenjele bumena bwakali bwachinkwa pe, pesi kuti bachenjelele injisyo zyaba Falisi aba Sadusi.

¹³ Lino Jesu nakasika kuzisi zili kufwifwi aa Kkayisaliya Filipi, wakabuzya basikwiya bakwe, wati, “Ino bantu bati Mwana aa Muntu ngwani?

¹⁴ Bakati, “Bamwi bakwamba kuti nduwe Joni mubbabbatizyi; bamwi bati, Elayija; alimwi bamwi bakuti, Jelemiya, na umbi wabasinsimi.”

¹⁵ Wakati kulimbabo, “Pesi nywebo mundamba kuti ndimeni?”

¹⁶ Sayimoni Pita wakasandula wati, “Nduwe Kkilisito Mwana wa Leza uupona.”

¹⁷ Jesu wakasandula akwamba kuti kulinguwe, “Uli aacholwe, Sayimoni mwana a Jona, nkambo nyama abulowa teensi nzizyo zyakuyubunwida eezi, pesi Taata wangu uli kujulu.

¹⁸ Alimwi ambebo ndamba kuti kulinduwe nduwe Pita, mpawo aatala amwaala ooyu ndiyoyaka mbungano yangu. Milyango yazibunda tikozokuzunda.

¹⁹ Ndiyokupa zijaluzyo zيابwami bwakujulu. Kufumbwa nchotakaange aansii chiyosungwa akujulu, alimwikufumbwa nchotakangunune aansii chiyosungununwa aakujulu.”

²⁰ Mpawo Jesu wakalayilila basikwiya kuti batakaambili naba umwi kuti wakali Kkilisito.

²¹ Kuzwa kuchindi echo Jesu wakatalika kwambila basikwiya bakwe kuti welede kwinka ku Jelusalema, kuyopengela zinti zyingi ku-maanza abapati abapayizi bapati abalembi, kujayigwa, akubusigilwa kubuumi kubuzuba bwatatu.

²² Mpawo Pita wakamubweza akumutola ki-umbali akumuchibula, wati, “Eezi azibe kule anduwe, Mwami; eezi zitazochitiki kulinduwe.”

²³ Pesi Jesu wakachebuka akwamba kuli Pita kuti, “Zwaawa kusule lyangu, Satani! Uli chile-byo kulindime, nkambo toyeezi atala azintu zya Leza, pesi ataala aazintu zيابantu.”

²⁴ Mpawo Jesu wakati kuli basikwiya bakwe, “Na muntu kayanda kunditobela, aalilube lwakwe, abweze chiingano chakwe mpawo anditobele.

²⁵ Nkambo kufumbwa uyanda kufutula buumi bwakwe uyobuswekelwa, alimwi kufumbwa uswekelwa buumi bwakwe nkambo kandime uyobujana.

²⁶ Nkambo chigwasyanzi kumuntu kuvuba nyika yoonse pesi akaswekelwe buumi? Ninzi nchakonzya kupa muntu muchibaka chabuumi bwakwe?

²⁷ Nkambo Mwana muntu uyoboola mubulemju bwa Wisi abangelo bakwe. Mpawo uyolumbula muntu umwi awumwi mbuli milimo yakwe.

²⁸ Chakasimpe ndamwambila kuti, mpubali bamwi benu bayiimvwi ano batakwe nibayolabila lufu mane lumwi bakabone Mwana aa Muntu kaboola mubwami bwakwe.”

17

¹ Nikwakayinda mazuba aali musanu abumwi Jesu wakabweza Pita, Jemusi a Joni mwanike wakwe, akubatola atala achilundu chilamfu abalikke.

² Wakasanduka kunembo lyabo. Busyu bwakwe bwakabalama mbuli zuba, azisamo zyakwe zyakaba mbuli mumuuni.

³ Amubone kwakaboneka Mozesi a Elija balambula awe.

⁴ Pita wakasandula akwamba kuti kuli Jesu, “Mwami, nchibotu kuli ndiswe kuti tube aano. Kuti koyanda, ndilakuchita matumba aatatu -

chimwi chibe chako, achimwi chibe cha Mozesi, achimwi chibe cha Elayija.”

⁵ Elyo kachili mukwambula, amubone, ijoba libalaama lyakabavumba, mpawo amubone, kwakazwa ijwi mujoba, lyakati, “Ngoyu Mwanangu ngundiyandisya, muli nguwe mundibotelwa. Amuswilile nguwe.”

⁶ Lino basikwiya nibakalimvbwa, bakavundaama aansii, akuyowa loko.

⁷ Mpawo Jesu wakaza, akubaguma akwamba kuti, “Mubuke mutayowi.”

⁸ Mpawo bakalanga kujulu pesi takwe ngubakabona kunze kwa Jesu luzutu.

⁹ Lino nibakali kuseluka achilundu, Jesu wakabalayilila, wati, mutambili muntu chilengano eechi kusikila mwana amuntu akabuke kubafu.”

¹⁰ Basikwiya bakwe bakamubuzya, bati, ino nkamboonzi balembi bamulawu balaamba kuti Elija welede kusanguna kuza?”

¹¹ Jesu wakasandula wati, “Elayija nchoonzyo uleza akubukulusya zintu zyoonse.

¹² Lino ndamwambil, Elayija wakasika kale, pesi tebakamuziba pe. Kwindi kuchita nchibakali kuyanda kuli nguwe. Munzila njiiyo, Mwana amuntu uyofwaba mumaboko aabo.”

¹³ Mpawo basikwiya bakamvwa kuti wakalikwambambuula ambabo atala a Joni Mubbabbatizi.

¹⁴ Eelyo nibakasika kunkamu, mwalumi wakaza kulinguwe, wafugama kunembo lyakwe akwamba,

¹⁵ “Mwami, komufwida luzyalo mwanawangu, mbuli mbwali sichisuntu ulokufwaba loko.

Nkambo ukkala kawida mumulilo na mumaanzi.

¹⁶ Ndali mwetede kuli basikwiya bako, pesi tebamuponia pe.”

¹⁷ Jesu wakavwiila akwamba kuti, “Izyalane litasyomi akukakatila, ndiyooaba achiindi chil-amfu biyeni kandikkede andinywe? Ndiyoba andinywe kusika lili? Mumweete okuno kuli ndime.”

¹⁸ Jesu wakalayilila dimoni, mpawo lyakazwa mulinguwe, amulombe wakaponesegwa kuzwa muhola eelyo.

¹⁹ Mpawo basikwiiya bakeza kuli Jesu kumbali akwaamb, Nkaambonzi nitwakachilwa kuli-tandila aanze?”

²⁰ Jesu wakati kulimbabo, “Nkambo kalusy-omo lweni lunini. Nkambo ndamwambila kasimpe, kansyonga mulijisi lusyomo niluba lunini mbuli nseke yembuto yamusitada, nga ulambila chilundu eechi, Eenda kuzwa ano kuya okiia, alimwi chiyoyeenda, takukwe chiyokachizya kuli nduwe.”

²¹ Malembe mabotu achindi tajisi pe. Pesi oyu musyobo wadimoni tuyendi akuzwa kunze kwakukomba akulyiimya.

²² Kabachikede mu Galili, Jesu wakati kuli basikwiiya bakwe, “Mwana amuntu uyopegwa mumanza abantu,

²³ alimwi bayomujaya, amubuzuba bwatatu uyobusigwa.” Basikwiya bakawusa kapatu.

²⁴ Elyo nibakasika ku Kapenawuma, ibalumi ibakabweza zipanzi zibili zyamali yamutelo bakaza kuli Pita akwamba, “Sa muiyisi wanu tagwisyi zipanzi zyamali yamutelo?

²⁵ Wakati, “Iyii ulatela.” Pesi Pita nakanjila mungánda Jesu wakaamba wati kuli nguwe chakusanguna akuti, “Uyeyaanzi, Sayimoni? Kuzwa kuliini bami baansi nkubabweza mutelo na bulumbu? Kuzwa kubana baabo na nkubeenzu?”

²⁶ Pita mpaakati, “kuzwa kubeenzu,” Jesu wakati kulinguwe, Pita wakasandula. “Lino bana bangununwa,” Jesu wakaamba.

²⁷ Pesi kuti tutachiti basimutelo kuti bachite chibi, koya kulwizi, mukawaale kaloby, akugwisya aanze inswi eyo itakazwe kutanguna. Na wajula mulomo wayo, ulajana Ishekkeli. Wibweze akwiipa basimutelo njiyangu ayako.

18

¹ Kuchiindi eecho basikiiya bakaza kuli Jesu akwaamba kuti, “Ngwani mupati mubwami bwakujulu?”

² Jesu wakayiita kana kanini kulinguwe wakakkazika aakati kabo,

³ akwaamba kuti kasimpe ndamwaambilamkuti ado musanduke akuba mbuli kana kaniini takukwe nimunga muyoonjila mubwami.

⁴ Nkaambo kakaako, kufumbwa ulibombya mbuli mwana muniini nguumupati mubwami bwakujulu.

⁵ Kufumbwa utambula kana kaniini mbuli oobu muzina lyangu wambula ndime.

⁶ Pesi kufumbwa utuka umwi wabaaba baniini bamusyoma ulabalebya, chilabota mbubo kulinguwe kuti aangwe ndomba lyabbwe munsingo yakwe, akubbizigwa aakati kalwizi.

7 “Maawe kunyika nkaambo kazilebyo! Aboobo kuleelede kuti zilebyo zibe, pesi maawe kuli yooyo muntu weeta zilebyo!

8 Kuti luboko lwakp na chituta chako chikupa chilebyo, chigonke ukuwaalila kule anduwe, kuli mbubo, kunjila mubuumi koli chilema na ko-tyokede kwiinda kuowelwa mumulilo utamani koli aamaboko aabili na mawuulu aabili.

9 Na liso lyko likuchita kuba chilebyo, ulidad-ule ulisowe kule aanduwe. Kuli mbubo kuti unjle mubuumi aliso limwi kwiinda kusowelwa mubbila lyamulilo koli ameso aabili.

10 Amuchenjele kuti utasmpawuuli umwi wabaaba baniini. Mbuli mbundaamba kulindinywe kuti kujulu kuli baangelo lyoonse balanga kubusyu bwa Taata uli kujulu.

11 Malembe mabotu achi Giliki taajisi munchali ooyo ulaabupanduliuzi bujanika muli bumwi, nkaambo Mwana aamuntu wakaza kuzoofutula eecho chakasweekede.

12 Uyeeyanzi? Kuti umwi uli aambebele mwaanda, mpawo iimwi yasweek, takonzyi kusiya zili makumi aali musanu aane azili musanu azine aatala aakalundu akuya kuyooyandu-ula eeyo isweekede?

13 Na wayijana, ndamwaambila kasimpe, ula-botelwa kwiinda eezyo zitasweekede.

14 Munzila ikozyene, teesi kuyanda kwa Taata uli kujuliu kuti umwi wabaaba baniini kuti batafwidilili.

15 Kuti munyoko wakubisizya, koya ukamutapatile aakati kako anguwe luzutu. Na wakuswilila, ulajana munyoko.

16 Pesi na takuswiilili, bweza umwi na bambi

babili kuti milomo yababili na baka, mboni batatu lyoonse jwi lilazuminika.

¹⁷ Lino kuti wakaka kubaswiila, ambila mbungano, kuti wakaka alimwi kuswiilila mbungano, muleke aabe mbuli muhedeni akuba mbuli simutelo.

¹⁸ Ndamwaambila kasimpe, kufumbwa zintu nzimwaanga ansi zilaangwa akuju; lu, aku-fumbwa zyaangununwa ansi zilaanguununwa akujuliu.

¹⁹ Alubo ndamwaambila na babili bazuninana atala achimwi nchibakumbila balachichitilwa a Taata uli kukulu

²⁰ . Aawa ali kobile na kotatu mpubabungene aamwi muzina lyangu, akooko ndinooli aakati kabo.

²¹ Eelyo Pita waza akwaamba wati kuli Jesu, “Mwamio tungee mukwesu kandisizya nzyen-timulekelele? Kusikila tuli musanu atubili!

²² Jesu wakati kuli nguwe, “Tandimwaambili tuli musanu atubili, kusikila kumakumi musanu aabili katupetedwe kusika kumusanu atubili.

²³ Nkaambo kaako bwami Bwakujulu bulikozyene awumwi Mwami wakayanda kubamba makani aababelesi bakwe.

²⁴ Mbuli mbwakasanguna kubamba, umwi wababelesi wakaletwa kuli nguwe iwakapedwe kkumi lyazyuulu zyamataalenta.

²⁵ Pesi mbwatakajisi chakuliya, Mwami wakwe wakamulayilila kuti awuzigwe, antoomwe amwanakazi wakwe abana azyoonse nzyakaliya kuchitwe.

²⁶ Mpawo mubelesi wakawida ansi, wavundama akwaamba wati, “Mwami ndikkazike

moyo, lino ndilakuya yoonse.

²⁷ Lino Mwami wamubelesi mbukunga wamufwida wamufwida luzyalo wamwaangwida mpawo wamulekelela chikoloto.

²⁸ Pesi mubesi ooyo wakeenda akujana umwi mubelesi wamunyina wakaliyisi madinali mwaanda, wakamubweza, watalika kumusina akwaamba kuti ndiliye nzwakabweza kuli ndime.

²⁹ Mpawo mubelesinyina wakawida ansio wamukumbila wati, “Ndikkazikile moyo, ndilakuliya.

³⁰ Pesi mubelesi mutaanzi wakakaka. kwiinda, wakaya wakuya kuyoomuwalila muntolongo kusika akaliye nzyakali mupede.

³¹ Lino babelesinyina nibakabona zyakachika, bakawusa loko. Bakasika akwaambila mwami wabo zyoonse zyachitika.

³² Mpawo mwami wamubelesi wakamwiita wati kulinguwe, iwe numubesi mubi, ndakakulekelela chikoloto choonse nkaambo wakandikumbila.

³³ Waleleede kumufwida luzyalo mubelesinyokwe, mbuli mbundakakufwida luzyalo?

³⁴ Mwami wakwe wakanyema akumupeda kuli basintolongo kusikila akaliye zyoonse nzyakabwezedede.

³⁵ Mbuboobo alakwe Taata wakujulu mbwayoomuchitila na temwalekelela munyoko kuzwa mumoyo.

19

¹ Kwakaba kuti Jesu amane majwi ay,

wakazwa ku Galili waya kuchisi cha Judiya mutala amulonga wa Jodani.

² Makamu makamu akamutobela, mpawo wakabaponia nkukoko.

³ Ba Falisi bakaza kuli nguwe, bamusunka, baamba kuli nguwe, “chili mumulawu kuti mwalumi aleke mwanakazi wakwe, katakwe kaambo.

⁴ Jesu wakasandula akwaamba, “sa temwakabala kuti oyo wakabalenga kuzwa kumatalikilo wakabalenga baalumi a abanakazi?”

⁵ Alubo oyo iwakabelnga wakati, 'Nkambo kaako Mwalumi uayosiiya wisi abanyina akukakatila kumwanakazi wakwe, aba bobile babe nyama imwi.

⁶ Lino tabachili babili, pesi nyama imwi. Nkinkaako echo Leza nchakaswaniizya, kutabi muntu uchipambukanya.”

⁷ Bakati kulinguwe, “Nkaambonzi elyo Mozesi wakatulayilila kuti apegwe lugwalo lwakulekana mpawo amuleke?”

⁸ Wakati kuli mbabo, “Nkaambo kabuyumu bwamyoooyo yenu, Mozesi wakamuzumizya kuleka banakazi benu, pesi kumatalikilo tekwakali munzila eyo pe.

⁹ Ndamwambila, kufumbwa uleka mwanakazi wakwe, kunze kwamakani abuvule, akuyo kwata uumbi, wachita bumambi; amwalumi ukwata mwanakazi wakalekwa wachita bumambi.”

¹⁰ Basikwiiya bakati kuli Jesu, “Na kuti ntwaambo twamwalumi amwanakazi wakwe, tachili chibotu kukwata.”

¹¹ Pesi Jesu wakati kuli mbabo, “Teensi bonse

batambula kaambo aka, pesi kuli baabo luzutu bapedwe.

¹² Nkambo nkubali bazibe bakachitwa bazibe abantu, alimwi mpubali bazibe bakalichita bazibe lwabo beni nkambo ka Bwami bwakujulu kuli ooyo ukonzya kutambula injiisyo eyi, muleke ayitambule.”

¹³ Lino bana baniini bakaletwa kuli nguwenkuti abaampe amaboko akukomba, pesi basikwiiya bakwe bakabakasya babakalalila.

¹⁴ Pesi Jesu wakaamba wati, “Amuzumizye bana banini, mutabakasyi kuti baze kuli ndime, nkambo Bwami bwakujulu mbubwabo bali boobu.”

¹⁵ Wakabika maboko aakwe alimbabo mpawo wakabasiya.

¹⁶ Amubona, mwalumi wakaza kuli Jesu akwamba kuti, “Muyiisi, nchichili chintu chibotu nchindinga ndilachita kuti ndibe abuumi ibutamani?”

¹⁷ Jesu wakati kuli nguwe, Nkamboonzi niwandibuzya atala chitegwa nchibotu? Kunze kwachintu chimwi, pesi na koyanda kunjila mubuumi, baamba milayizyo.”

¹⁸ Oyu mwalumi wakati kuli nguwe, milayizyo nzi?” Utajayi, utachiti bumambi, utabbi, utapi bukamboni bwakubeja,

¹⁹ lemeka wuuso abanyoko akuyanda ngoyakilene anguwe mbuli lwako omwini.”

²⁰ Mwalumi mukubusi wakati kuli nguwe, “Zyoonse ezi zintu ndakazilemeka. Ndichiyanaanzi?”

²¹ Jesu wakamwambila wati, “Na koyanda kuti

ulondoke, koya, ukawuzye lubono lwako, akuy-
opa bachete, mpawo uyooba abuvubi kujulu,
lino uboole, unditobele.”

²² Pesi eelyo mwalumi mukubusi nakamvwa
Jesu nzyakaamba, wakayinka kawuside, nkambo
wakalijisi imbono nyiingi.

²³ Jesu wakaambila basikwiiya bakwe,
“Kasimpe ndamwambila, nchiyumu kumuvubi
kuti akanjile kubwami bwakujulu.

²⁴ Alimwi ndamwambila kuti, nkutete
kunkamela kunjila muliso lyaneleti kwindi
kuti muvubi anjile mubwami bwa Leza.”

²⁵ Lino basikwiiya nibakamvwa oobo, bak-
agambilwa loko, akwaamba kuti, “Ino ngwani
ukoonzya kuyofutulwa?”

²⁶ Jesu wakabalanga akwaamba kuti, 'kubantu
tachikonzeke, pesi kuli Leza zintu zyoonse zi-
lakonzeka.”

²⁷ Mpawo Pita wakavwiila akwamba kuti
“Langa, twasiya zintu zyesu zyoonse twatobela
nduwe. Ani mpawo tukajanenzi?”

²⁸ Jesu wakati kuli mbabo, “Ndamwambila
kasimpe kuti, muchiindi chiza Mwana a Muntu
nayokkala achuno chakwe chabulemu, inywe
nimwakanditobela muzokkala azyuno zilikkumi
azibili, mukabeteke misyobo ili kkumi ayibili ya
Izilayeli.

²⁹ Woonse oyo iwakasiide maanda, babun-
yiina, bachizi, wisi, banyina niiba myuunda
nkambo kazina lyangu uyotambula tuli mbuli
mwanda umwi akukona buumi ibutamani.

³⁰ Pesi bataanzi baanji bayoba bakumamanino,
abakumamanino bayoba batanzi.

20

¹ “Nkambo bwami bwakujulu buli mbuli mwanimunda wakazwa kuseni loko kuyotamba basikubeleka mumuunda wakwe wamasansa.

² Nikwakamana kuzuminana abasimulimu kudinali lyomwe abuzuba, wakabatuma kumunda wamasansa wakwe.

³ Alubo wakenda chindi chamahola atatu mpawo wakabona bamwi basimilimu kabayimvwi kabatakwe nchibachita kubusena bwakuuzizya.

⁴ Kuli mbabo wakati, 'Anywebo, kamuya mu-muunda wamasansa alubo ndilakumupa zilik-abotu.' Nkako bakayinka kumulimu.

⁵ Alimwi wakiinka kunze muhola lyamusanu alimwi amuhola lyamusanu aane, akuyochita chikozyenie.

⁶ Limbi lubo kusika kuhola lyakkumi alimwi wakazwa alimwi wakujana bamwi balimvwi katakwe nchibalikuchita.

⁷ Wakati kulimbabo, 'nkambonzi nimwimvwi awa kamutakwe nchimulikuchita zuba lyoonse?' “Kulinguwe bakamba kuti, 'nkambo takwe pe watutambila mulimo.' “kulimbabo wakati, ánywebo lubo mwinke mumunda wamasansa.”

⁸ Lino nilyakaba golezya, mwani muunda wakati kumupati wamulimo, 'Yita basikubeleka alubo ubape bulumbu bwabo, utangune abasyalizi umane akumutaanzi.'

⁹ Eelyo basimilimo bakanjila aholo lyakkumi alimwi bakeza, awumwi wabo wakatambula dinali.

¹⁰ Nibakeza basimulimo batanzi, bakalikuyeya kuti balatambula zyiingi, pesi abalabo bakatam-

bula dinali lyomwe awumwi.

¹¹ Nibakatambula bulumbu bwabo, bakasy-oloka atala mwanimunda.

¹² Bakati, 'Aba basimulimo basyalizi babeleka biyo hola lyomwe, pesi mwabachitila bvukozye-nie andiswe, iswebo nitwaminwa buzuba bonse alubo muzuba lyuumpa obu.'

¹³ "Pesi mwanimunda wakavwiila umwi wabo wati, 'mwenzuma, takwe chibi nchindamuchi-tila. Temwazuminene andime na ku dinali lyomwe?

¹⁴ Amubweze zyanu mwende enzila yanu. Ndasala kupa basimulimo basyalizi zikozyenie azyenu.

¹⁵ Tazili mumulawu na kuchita mbuli m bwenjanda achintu changu? Wabasibbivwe na nkambo ndimwabi?"

¹⁶ Nkinkako musyalizi uyoba mutanzi, amu-taanzi uyoba musyalizi." Malembe aansiku mabotu takwe banji bayitidwe, pesi basalidwe mbache.

¹⁷ Lino Jesu nakalikuya ku Jelusalema, wakab-weza abalikkumi ababili kumbali, alubo munzila wakati kulimbabo,

¹⁸ "Amubone, tuyobuya ku Jelusalema, alubo Mwana Muntu nkwayowabwa mumaboko aba-payizi bapati abalembi basimulawu. Bayomu-tama kusikila kulufu

¹⁹ alubo bayomutola kuli bamasi kuti ba-muniake, akumuuma, akuyomubambula. Pesi mubuzuba bwatatu uyobusigwa."

²⁰ Mpawo banyina babana balombe ba Zebbe-diya bakaza kuli Jesu abana babo. Wakafugama aansii kunembo lyakwe alubo wakakumbila

chimwi chintu kulinguwe.

²¹ Jesu wakati kulinguwe, “Niinzi ncholombozya?” wakati kulinguwe, “Layila bana bangu aba kuti bakkale, umwi kululyo umwi kulumwensi lwaluboko, mubwami bwako.”

²² Pesi Jesi wakasandula wati, “Tochizi nchokumbila. Ulakonzyana kunywa mukanywido nkindaamba kunywa?” Kulinguwe bakamba kuti, “Tulakonzya.”

²³ Wakamba kuti kulimbabo, “Kanywido kangu mulakonzya kunywa. Pesi kukkala kululyo lwangu akuchimweensi tendime uupa pe, pesi nzizyabaabo bakabambilwa a Taata.”

²⁴ Elyo basikwiya bamwi balikkumi nibakachimvwa echi bakanyema kapati abaaba babunyina babili.

²⁵ Pesi Jesu wakabita kulinguwe akwamba kuti, “mulizi kuti bendelezi babamaasi balabendeleya, abalabo bapati baabo babulemu bezyanisya nguzu zyabo alimbabo.

²⁶ Pesi tazyelede kuti kube anzila eyo akati kenu. Anukuti, kufumbwa ulombozya kuba mupati akati kenu abe mulanda wenu,

²⁷ alubo kufumbwa ulombozya kuba mutanzi akati kenu welede kuba mulanda wenu,

²⁸ mbuli Mwana Muntu mbatakazidide kukutawukilwa, pesi kukutawuka, akupa buumi bwakwe mbuli muulo wabingi.”

²⁹ Nibakazwa ku Jelikko, inkamu mpati yakamutobela.

³⁰ Kwakali balumi babili boofu bakakkede kumbali lyamugwagwa. Elyo nibakamvwa kuti Jesu walikwiinda, bakompolola, “Mwami,

Mwana Davida, ba aluzyalo andiswe.”

³¹ Mbungano yakaba kalalila, bababuzya kuti bawumune, pesi bakakwila chakwindilila, “Mwami, Mwana Davida, ba luzyalo kulindiswe.”

³² Mpawo Jesu wakayima alubo wakita kulimbabo wati, “ninzi nchimulombozya kuti ndimuchitile?”

³³ Bakaamba kuti kulinguwe, “Mwami, kuti meso esu ajulike.”

³⁴ Mpawo Jesu, kali wasungilizigwa aluzyalo, wakabaguma meso aabo, mpoonya awo bakatambula kubona akumutobela.

21

¹ Awo Jesu abasikwiya bakwe nibakasika ku Jelusalema alubo bakakusika ku Bbetipegi, kukalundu ka Olivusi, mpawo Jesu wakatuma basikwiya bakwe bobile,

² wakati kuli mbao, “Kamuya kumunzi ulikunembo, alimwi muyofwambana kubona donki lyangidwe nkuko, alubo akana kelyo. Mwawangunune mwalete kulindime.

³ Kutu kwaba utabe achakwamba atala angawo, mukambe kuti, 'Mwami ulayanda,' alimwi oyo muntu uyofwambana kumupa ngawo.

⁴ 'Lino kwakaba kuti ezyo zyakali zyambwa kwinda kumusinsimi zizuzikizigwe. Wakati,

⁵ “Ambila mwana musimbi we Zioni, 'Langa, Mwami wanu ulaza kulindinywe, Ulibombede alimwi ulitantide a donki, Akukana ka donki, mwana we donki.”

⁶ Mpawo basikwiya bakinka bakuchita mbunya Jesu mbwakabalayililide.

⁷ Bakakuleta donki akana alubo bakabika zikobela zyabo a donki, alimwi Jesu Jesu wakakkala ajulu azikobela.

⁸ Makamumakamu manji akayala zikobela zyabo mumugwagwa, alimwi bamwi bakagonka ntabi zyamisamu akuyobuyala mumugwagwa.

⁹ Mpawo makamu akenda kunembo lya Jesu alubo abaabo bakali kuyobutobela kabay-obompolola, “Hosana kumwana wa Davida!” Ulongezegwe ngoyo uuzamuzina lya Mwami! Hosana kuli simajulu!”

¹⁰ Elyo Jesu nakasika ku Jelusalema, idolopo lyoonse lyakali lyanyonganisigwa akwamba kuti, “Ngwani oyu?”

¹¹ Makamumakamu akasandula, “Oyu ngu Jesu musinsimi uzwa waku Nazaleta mu Galili.”

¹² Mpawo Jesu wakanjila mungánda ya Leza. Wakaandilanze boonse abo bakali kuula aku-uzya mungánda ya Leza, alubo wakasandamuna matafula abasikuzizya mali alubo azikkalo zyaababo bakali kuzya nziba.

¹³ Wakati kulimbabo, “Kulilembedwe, 'Ngánda yangu iyowambwa kuti ngánda yakukambya; pesi mwayichita kuti ibe chikkalilo chababb.”

¹⁴ Mpawo mofu achilima bakeza kulinguwe mungánda ya Leza, alubo wakabaponya.

¹⁵ Pesi elyo bapayiza bapati alubo abalembi bamulawu nibakabona zintu nzyakachita, alubo elyo nibakamvwa bana balompolola mungánda yaLeza alubo balamba, “Hosana kumwana a Davida, “bakaba akunyema kupati.

¹⁶ Bakati kulinguwe, “Ulibamvwide na kuti balikutyeni Jesu wakati kulimbabo, “Iyii! Pesi

takwe nimwakabalide, 'kuzwa kumilomo yabana banini atunyonka wakabamba intembawuzyo'?"

¹⁷ Mpawo Jesu wakabasiya alubo akuzwa mudolopo lya Bbetani akumana busiku nkuko.

¹⁸ Lino kuseni wakayinka nakali kujokela kudolopo, wakali waba anzala.

¹⁹ Nakabona mukuyu muni lyamugwagwa, wakayinka kulinguwo akujana kakutakwe chintu kuli nguwo kunze kwamatu. Wakaamba kuti kulinguwo, "Kutakabi kuti kukabe michelo lubo kuzwa kulinduwe alimbi," alubo mponya awo mukuyu wkapusama.

²⁰ Elyo basikwiya nibakawubona, bakagamba akwamba bati, "Ibiyeni mukuyu wapusama mpawonyaawa?"

²¹ Jesu wakasandula akwamba kulimbabo, "Masimpe ndamba kulindinywe, na mulijisi lusyomo alubo kamutadoneki, tamukwe nimuyochita zyakachitwa amukuyu biyo pe, pesi muyowamba nikuba kuchilundu echi, 'Zyukuka akuwalwa mulwizi; alubo ziyochitika.

²² Kufumbwa nchimuyolomba munkombyo, chakuzumina, muyozitambula."

²³ Elyo Jesu nakasika munganda yaLeza. Bapayizi bapati antomwe abapati babantu bakasika kulinguwe kali mukuyisya basikuti, "Anguzu nzi nzyochitya zintu ezi, alubo ngwani wakakupa nguzu ezi?"

²⁴ Jesu wakasandula akwamba kulimbabo, "Ambebo ndilamubuzya mubuzyo umwi. Na mwandambila, ndiyomwambila kuti nkunguzunzi nzindichitya ezi.

25 Lubbabbatizyo lwaJoni - nkukuli nkulwakazwa? Lwakazwa kujulu na kuti nkubantu?" Bakambuzyania akati kabo, bakati,

26 "Na tutedi, Luzwa kujulu,' Ulamba kuti kulindiswe, 'Nkambonzi mpo nimwakatamusyoma?'Pesi na tutedi nkubantu,'tuyowa nkamu yabantu nkambo boonse babona Joni mbuli musinsimi."

27 Mpawo bakasandula Jesu alubo bati, "Tatuze pe." Wakamba alimwi kulimbabo, "Nsikwe nensikamwambile ambebo kuti ninguzunzi nzindichitya azyozintu ezi.

28 Pesi muyeyaanzi mwalumi wakali abana balombe babili. Wakaya kumutanzi alubo wakati, "mwanangu, koya ukabeleke sunu munda wamasansa.

29 "Mwana wakasandula wati, "Tandiinki, pesi mukuya kwachiindi wakasandula mizezo yakwe wakinka.

30 Mpawo mwalumi wakaya kumwana wachibili akwamba chintu chikozyenie. Wakasandula wati, 'Ndilayinka, 'Ta; pesi takwe nakinka pe.

31 Nguuli mubana babili aba wakachita kuyanda kwawisi?" Bakati, "Mutanzi." Jesu wakati kulimbabo, "Masimpe ndaamba kulindinywe, basimutelo abasimamambe bayonjila mubwami bwa Leza kamutana kunjila.

32 Nkambo Joni wakeza kulindinywe minzila yabululami, pesitemwakamusyoma pe. Pesi basimutelo abasimamambe bakamusyoma. Pesi nywebo, nikuba elyo mwakazibona ezi, temwa-keempwa mukuya kwachindi alubo temwakamusyoma.

33 “Amuswilile kuli ambi mambilambali. Kwakali umwi mwalumi, mukamwini munda wakabyala masansa, wakayaka lubaya alinguwo; wasikusya chikandilo mukati kawo, wayaka ngánda yamujulu, alubo wakayiboleka kuli basikulima masansa. Mpawo wakaya kulichimwi chisi

34 Elyo chiindi chakutebulwa kwamasansa nichakasika, wakatuma bamwi babelesi kuli basikulimina masansa kuti bakabweze michelo yakwe.

35 Pesi basikulimina masansa bakabweza babelesi bakwe bawuma umwi, bajaya awumwi, alubo bamutulula mabwe.

36 Alubo, mwanimunda wakatuma bambi babelesi bayingi kwindi batanzi, pesi basikulimina masansa bakabajata zikozyenie.

37 Kwiinda awo, mwanimunda wakazotuma mwanakwe kulimbabo, kuti, 'Bayo mulemeka mwanangu.

38 “Pesi elyo balimi bamasansa nibakabona mwana, bakati akati kabo, 'Ngoyu sikukona. Mubole, muleke tumujaye akubweza lukono.

39 'Nkinkako bakamubweza, bamusowela kunze amuunda akumujaya.

40 Lino elyo mwanimunda asika, ninzi nchayochita abo balimi bamasansa?”

41 Bakati kulinguwe, “Uyonyonyona abo baalumi babuyo muli imwi nzila njumu, alubo uyobatandila aanze amuunda akubika bambi basikulimina masansa, bantu bayomupa chabilo chazilimwa kuchiindi chakuyebula.”

42 Jesu wakati kulimbabo, “Sena temwakabala mumalembe, Íbbwe bayaki ndibakakaka lyaka-

chitwa munsemo. Echi chakazwa ku Mwami, alubo zilagambya mumeso esu'?

⁴³ Nkinkako ndamba kuti kulindinywe, bwami bwa Leza buyobwezwa kuzwa kulindinywe akuyopegwa kuchisi chiyopanga michelo yacho.

⁴⁴ Kufumbwa uwida atala abbwe eli ulakutyoka kuba tumpanzi, pesi umwi ngulitawide atala ulakupwasuka.”

⁴⁵ Elyo bapayizi bapati aba Falisi nibakamvwa mambilambali akwe, bakamvwisisisya kuti wakalikwamba ataala ambabo.

⁴⁶ Bakayandula kumwanga, pesi bakayoowa makamu abantu, nkambo bantu bakali mujisi mbuli musinsiimi.

22

¹ Jesu wakambula lubo kulimbabo mumambila mbali wakati,

² “Bwami bwakujulu buli mbuli umwi mwami wakabambila ipobwe lyakukwatana lyamwanakwe.

³ Wakatuma babelesi bakwe kuyoyita abo bakatambidwe kuti baze kupobwe pesi tebakasika.

⁴ Alimwi mwami wakatuma bambi babelesi, kuti, bambile aabo batambidwe, “Mulange, ndabambilila chisusulo chabasune bangu angómbe zyangu zinenede zyajayigwa, alubo zintu zyoonse zyzabizwa. Muze kupobwe lyalukwatano.”

⁵ Pesi tebakaswilila pe alimwi bakainka, umwu kumunda wakwe mupati, awumwi kumakwebo akwe.

⁶ Bamwi bakajata babelesi ba Mwami, bakabajata enzila ifwisya nsoni, akubajaya.

⁷ Mwami wakanyema, akutuma basilumamba bakwe akuyonyonyona aabo bajayi akubawumpila dolopo lyabo.

⁸ Mpawo wakati kubabelesi bakwe, kuswanizigwa kwazulila, pesi abo bakatambidwe tebakali kwelela.

⁹ Aboobo kamuya mumanzanino anzila akuyotamba bantu banji kupobwe lyakukwatana mbuli mbimutajane.'

¹⁰ Babelesi bakayinka enzila akubunganya antomwe bantu boonse mbibakajana, bonse babi ababotu. Nkinkako ngánda yepobwe lyakukwatana yakazozula abantu.

¹¹ Pesi Mwami nakasika mukati kuzolanga batambidwe, wakabona kakuli mwalumi wakatazwete zizwato zypobwe lyalukwatano.

¹² Mwami wakati kulinguwe, Mwenzuma, wanjila byeni omuno kotasamide zizwato zypobwe lyalukwatano?'Pesi mwalumi wakabula alyakwamba.

¹³ Mpawo mwami wakati kubabelesi, 'mumwange mwalumi oyu kumaboko akumawulu, alubo mumusowele aanze mumudima, oko kunoli kulila akuluma ntwino.'

¹⁴ Nkambo mbingi bantu batambidwe, pesi mbache biyo basalidwe."

¹⁵ Mpawo baFalisi bakinka akuyobamba mbu-batamuche Jesu kuzwa kungambwido yakwe.

¹⁶ Mpawo bakatuma kulinguwe basikwiya babo, antomwe abaka Helodiya. Bakati kuli Jesu, 'Ómuyisiyi, tulizi kuti uli wakasimpe, alubo kuti uyiisya nzila yaLeza mubwini. Tomvwi miyeyo yawumwi pe alubo totondezya kusiyanisya pe

akati kabantu.

¹⁷ Mpo kotwambila, uyeyanzi? Zili mumulawu na kubbadala mutelo kuli Siza na pe?”

¹⁸ Pesi Jesu wakamvwisisisya bubi bwabo wakati, “Nkambonzi nimundisunka, nywebo nobasikuupawupa?”

¹⁹ Munditondezye mali yabbwe yamutelo.” Mpawo bakamwetela dinali kulinguwe.

²⁰ Jesu wakati k ulimbabo, “Ngwani ulachechi chikozyanisyo e zina?”

²¹ Bakasandula kuti, “nzizya Siza.” Mpawo Jesu wakati kulimbabo, “alimwi amupe Siza zintu zya Siza, alubo kuli Leza zintu zya Leza.”

²² Elyo nibakazimvwa, bakagamba. Mpawo bakamusiya akwenda.

²³ Mubuzuba oobo bamwi ba Sadusi, abo baamba kuti takwepe bubuke bwabafu, bakeza kulinguwe. Bakamubuzya,

²⁴ kabati, 'Muyisiyi, Mozesi wakatedi, “Na mwalumi wafwa, kataside bana, mukulana wakwe welede kukwata banakwe akumujanina bana mukulana wakwe.

²⁵ Kwakali bakulana bali musanu ababili. Mutanzi wakakwata mpawo wakafwa katasiide bana, wakasiya mwanakazi wakwe kumwanike wakwe.

²⁶ Alimwi alakwe mwanike wachibili wachita chintu chikozyania, mpawo awatatu, mulongo woonse kusikila kuli wamusanu ababili.

²⁷ Kwinda kwabo boonse, mwanakazi wakazofwa.

²⁸ Lino kububuke bwabafu, ngwani utakabe mwani mwanakazi mubakulana bali musanu ababili? Nkambo boonse bakali mukwete.”

²⁹ Pesi Jesu wakbasandula akuti kulimbabo, “Nywebo muliswekede, nkambo tamuzi malembe naa inguzu zya Leza.

³⁰ Nkambo mububuke bwabo takwe nekuba kukwata nikuba kukwatisigwa. Anukuti, bayoba mbuli baangelo bali kujulu.

³¹ Pesi atala abubuke bwabafu, temwakabala na zyakaambwa kulindinywe a Leza, kuti

³² Ndime Leza wa Abbulahamu, Leza wa Ayizeki, alimwi Leza wa Jakobo? Leza teensi Leza wabafwide, pesi waba pona.”

³³ Eelyo makamu nakamvwa eezi, bakagamba kunjiisyo zyakwe.

³⁴ Pesi ba Falisi nibakamvwa kuti Jesu wakawumuzya ba Saduki, bakalibungania lwabo beni antomwe.

³⁵ Umwi wabo, uyiide zyamulawu, wakamubuzya mubuzyo, kumusunka -

³⁶ “Muyiisi, nguuli mulayizyo mupati mumulawu?”

³⁷ Jesu wakati kulinguwe “Yanda Mwami Leza wako a moyo woonse, alubo amiyeyo yako yoonse.’

³⁸ Oyu ngomulazyo mupati alubo ngomutanzi.

³⁹ Alimwi awabili mulayizyo ulimbuli oyu - Yanda mwenzinyokwe mbuli mboliyanda lwako.’

⁴⁰ Amilawu eyi ibili mpokuzulila mulawu woonse abasinsimi.”

⁴¹ Lino ba Falisi nibakachibungene antomwe, Jesu wakababuzya mubuzyo.

⁴² Wakati, “muyeeyanzi aatala a Kkilisito? Mwana wani?” Bakamusandula, “mwana wa

Devidi.”

⁴³ Jesu wakati kulimbabo, “Biyeni mpo Devidi mumuuya ulamwiita kuti Mwami, kaamba,

⁴⁴ 'Mwami wakati ku Mwami wangu. “Kkala kuluboko lwangu lwachilisyo, kusikila ndayita basinkonyokwe chikkalilo chamawulu ako”?

⁴⁵ Kuti Devidi wakiita Kkilisito kuti 'Mwami,' nkambonzi nali mwana wa Devidi?”

⁴⁶ Takwe wakakonzya kumusandula jwilyomwe, alubo takukwe wakachili kuyanda kumubuzya imbi mibuzyo kuzwa elyo zuba.

23

¹ Mpawo Jesu wakambuula kubbunga lya-bantu alimwi akuli basikwiiya bakwe.

² Wakati, “Balembi aba Falisi bakkala muchuno cha Mozesi.

³ Nkiinkako kufumbwa nchibamulayilila kuchita amuchite nzizyo akuzibeleka. Pesi mutakatobelezyi inchito zyabo pe, nkambo baambula zintu nzibatachiti pe.

⁴ Iyii, balabamba mitolo miyumu kukwinyampula, alimwi balabikkala amakkuko aabantu. Pesi bo lwabo tabanyampuli pe kanwe kabo kuti banyampule.

⁵ Balachita zyoonse nzibachita kuti babonwe abantu. Balalichitila zipati alimwi balakomezya myoombe yezibaki zyabo.

⁶ Bayanda zyuuno zyabapati kumapobwe alimwi azyuuno ezyuuno zyabapati muzikombelo,

⁷ alimwi bayanda injuzyo zilikabotu muzisambalilo, alimwi akwiitwa kuti 'Mwami'abantu.

⁸ Pesi inywebo tamwelede pe kwitwa kuti 'Mwami' nkambo mulijisi umwi alimwi nywebo moonse mulibabunyina.

⁹ Alimwi mutayiti muntu anyika ansi aano kuti Taata, nkambo mulawe omwe Taata, alimwi ulikujulu.

¹⁰ Nikuba kuti ngamulategwa muyiisi, nkambo mulijisi muyisi umwi luzutu, Kkilisitu.

¹¹ Pesi oyo mupati akati kenu uyoba mulanda wenu.

¹² Nikuba nabaani ulisumpula uyofwinsigwa, alimwi nikubaani ulifwinsya uyosumpulwa.

¹³ Pesi maawe kuli ndinywe, nobalembi alimwi abaFalisi, nobasikuupawupa! mulajala abwami bwakujulu kubantu.

¹⁴ Nkambo tamunjili pe nywebo, alimwi tamukwe nimubazumizya aabo abayanda kunjila kuti banjile.

¹⁵ Maawe kulindinywe, nobalembi alimwi nobaFalisi, basikuupawupa! nkaambo muulya zintu zili mumaanda abamukabafu kamukomba nkombyo ndamfu. Muyotambula mulandu mupati. Maawe kulindinywe, nobalembi alimwi nobaFalisi, basikuupawupa! Nkambo mulayinka akulwizi alimwi akunyika kuti mukasandule muntu umwi, alimwi na waba oyo umwi, ngamwamuchita tubili kuba mwana wegehena mbuli ndinywe.

¹⁶ “Maawe kuli ndinywe, nobeenzyi baboofu, inywe nimuti, “Ooyo ukonka antempele takwe pe. Pesi ooyo ukonka angolida zyantempeli, ulangidwe kuchizuminano chakwe.

¹⁷ Inywe noboofu bafubafuba! Niinzi chipati,

ingolida nikuba ntempeli eyo ichita ngolida kuti isalale?

¹⁸ Alimwi, óyo ukonka kuchipayililo, takukwepe. Pesi ooyo ukonka echo chili achipayililo, ulaangidwe kuchizuminano chakwe.

¹⁹ Inywe nobantu boofu, Niinzi chipati, ichipo nikuba chipayililo eecho chichita kuti ichipo chisalale?

²⁰ Eelyo, ooyo ukonka kuchipayililo ukonka nchiicho alimwi azyoonse ezyo zili alinchicho.

²¹ Ooyo ukonka kuntempeli ukonka njiiyo alimwi ayooyo ukkala mukati.

²² Alimwi ayooyo ukonka akujulu ukonka achuuno chabulemu bwa Leza alimwi ayooyo ukkala alinchiicho.

²³ Maawe kulindinywe nobalembi alimwi anoba Falisi basikuupawupa! Nkambo mulpayizya chakumi chazisyu zyachinsyungwa abbonko akanyansya, pesi mwasiya akutachita zintu zipati ezyo zyaamba mulawu- bwendelezi bubotu alimwi aluzyalo mpawo alusyomo. Pesi eezi mwalelede kuti naka mwazichita alimwi akutasiya nikuba chimwi chanzizyo.

²⁴ Inywebo nobasikwenzya boofu, mulatingwa akawuka pesi mumena inkamela!

²⁵ Maawe kulindinywe, nobalembi alimwi aba Falisi, basikuupawupa! Nkaambo musanzia inkomeki kunze kwayo mpawo andyido, pesi muzili mukati zilizwide kutangala akutayendelegwa kabotu.

²⁶ Inywe noba Falisi boofu! Musanzye muzili mukati nkomeki sansina amukati kandyido, kuchitila kuti kunze kusambe akulako.

²⁷ Maawe kulindinywe, nobalembi aba Falisi basikuupawupa! Nkaambo mulimbuli tubanda tulambidwe amilambo ituuba, eezyo zilangi-ika kubota anze, pesi mukati zizwide mafuwa abantu bakafwa alimwi azyoonse zyamudima.

²⁸ Munzila njiyeeyo, anywebo aanze kwanu muli mbuli bantu baluleme kubantu, pesi mukati mulizwide kuupawupa ameso alimwi abubi.

²⁹ Maawe kulindinywe, nobalembi aba Falisi, basikuupawupa! Nkaambo mulayaka tubanda twabasinsiimi alimwi akubotezya tubanda twabaluleme.

³⁰ Mwamba kuti, “Kwanoli twakaliko mumazuba abamataata, nikuli tetwakabape mulibaabo bakatila bulowa bwabasinsiimi.’

³¹ Nkinkaako mulalyaamba nobeeni kuti muli bana babaabo bakajaya basinsiimi.

³² Alimwi mwazuzikizya bulemu bwabamawuso.

³³ Inywe nobazooka, inywe nobana bachipile, muyokuchija biyeni kubetekwa kwagehena?

³⁴ Nkambo kako, amubone, ndamutumina basinsimi abalumi basongo alimwi abalembi. Bamwi babo muyobajaya akubagankamina, alimwi bamwi muyobakwipawula muzikombelo zyenu alimwi muyobatanda kuzwa kumunzi akumunzi.

³⁵ Impindu njakuti andinywe kuyozwa bulowa boonse bwabataluleme oobo bwakatika enyika, kuzwa kubulowa bwa Abbelu mululami, domane kubulowa bwa Zakkaliya mwana wa Bbelekkiya, ooyo ngumwakajaya akati kantem-peli achipayililo.

³⁶ Kasimpe ndamwambila, zintu eezi zyoonse

ziyozida aabo bapona sunu

³⁷ “Jelusalema, Jerusalema, inywe nimujaya basinsiimi alimwi akudonkola aabo batumwa kuli nduuwe! Ndakaliswini kuyanda kubunganya bana bako antoomwe, mbuli inkuku mbi-fukatila twana twayo muni lyamababa ayo, pesi tewakazumina pe!

³⁸ Amubone, ngánda yenu yachaala kulindinywe yaba mbulitongo.

³⁹ Alimwi ndamwambila, tamuchizondiboni pe kuzwa lino dokusikila mukaambe kuti, uula-schoolwe ooyo uza muzina lya Mwami.”

24

¹ Jesu wakazwa aanze achikombelo weenda. Basikwiiya bakwe bakeza kulinguwe kuzomutondezya mayake achikombelo.

² Pesi wakabasandula wati kulimbabo, “Tamuzibwene pe zintu eezi zyoonse? Nkasimpe ndamwambila, takukwe ibbwe liyochala atala alimwi litakwe kuyobwalwa aansii.”

³ Nakachikkede atala lye chilundu cha Olivusi, basikwiiya bakamusikila kumbali bati, “twambile, ndilili nikuyochitika zintu eezi? Ninzi chiyoba chitondezyo chakuboola kwaako alimwi amamanino anyika?”

⁴ Jesu wakabasandula wati kulimbabo, “Amuchenjele kuti kutabi umwi umusowa.

⁵ Nkaambo kuyozwa bayingi muzina lyangu. Bayowaamba kuti, 'ndindime Kkilisito, alimwi bayosowa bantu bayingi.

⁶ 'Muyomvwa nkondo azyaambo zyankondo. Amukalange kuti zitakamukatazyi pe, alimwi

eezi zintu zyeedelede zichitike; pesi mamano katanakuba pe.

⁷ Nkambo inyika iyobukila nyikanyina, alimwi bwami abwaminyina. Kuyoba nzala alimwi amuzuzumina wenyika mumabazu asiyene siyene.

⁸ Pesi zintu ezi zyoonse matangunino biyo amachise amuntu sikutumbuka.

⁹ Elyo bayomutola kukwezegwa akuyomujaya. Muyosulwa enyika zyoonse akambo kezina lyangu.

¹⁰ Eelyo bantu bayingi bayobukilwa, alimwi akwaba umwi awumwi akusulana umwi awumwi.

¹¹ Basinsiimi bayingi babeji bayoza akuzosowa bayingi.

¹² Nkambo bupapi buyovula, luyando lwabayiongi luyotontola.

¹³ Pesi oyo uyokakatila kusikila kumamanino uyofutulwa.

¹⁴ Ayamakani mabotu abwami ayokawukwa munyika yoonse mbuli bukamboni kumanyika oonse. Eelyo mamano ayosika.

¹⁵ “Lino, nimuzobona chisesemyo chisisidwe, chaakambwa a Daniyele musinsiimi, kayiimwi mubusena busalala” (ooyo ubala amvwisisisye).

¹⁶ Amuchite kuti aabo balimuJudiya bachijile kuzilundu,

¹⁷ ooyo uli achiluli changanda ataseluki aansu kuzobweza nikuba chimwi chintu chilimunganda,

¹⁸ alimwi amuchite ooyo ulimumuunda aleke kujokela kuzobweza chakusama chakwe.

¹⁹ Pesi maawe kubabo bamintide akuli baabo banyonsya bana mumazuba aayo!

²⁰ Amukombe kuti kuchija kwenu kutakabi muchindi champeyo nikuba mubuzuba bwasabata.

²¹ Nkambo kuyoba mapenzi mapati loko, aayo atana kubonwa pe kuzwaida kumasangunino anyika kuzosikila lino, pe, takwe nikuzoba zili mbubobu pe.

²² Nakuti mazuba aayo pesi afwinsigwa, tek-wali kunooba naba muntu walikuzofulwa. Pesi nkambo kabasale aayo mazuba ayofwinsigwa.

²³ Lino kuti umwi muntu wamba kulindinywe kuti, 'Langa, ngoyu Kkilisito!' mutakamuzuminini pe akuzisyoma.

²⁴ Nkambo baKkilisito bakubeja abasinsimi babeji bayosika akuchita malele mapati azigambyo, kuti baleesye, nikuba, aabo basale.

²⁵ Amubone, ndamwambila kazitana kuchitika pe.

²⁶ Lino kuti baamba kuti kulindinywe, 'Mulange, ulimunkanda, 'mutakayinki pe oko kunkanda. Nikuba kuti, 'mulange, mwali munganda zyamukati, 'mutakasyomi pe.

²⁷ Mbuli lulabi mbulumweka kuzwa kubuzwezuba alimwi lulamvwikkila koonse kusikila kububbila, oko kuyoba nkuboola kwa Mwana Muntu.

²⁸ Oko kuli munyama ufwide, nkukubungene makubi.

²⁹ Pesi mpawawo kwakumana mazuba amapenzi aya izuba liyosiya, mweezi tuchiko kuyopa mumuni pe, inyenyezi ziyoowa kuzwa kujulu, alimwi manguzu ejulu ayotikinisigwa.

³⁰ Lino chitondezyo cha Mwan a Muntu chiyoboneka mujulu, alimwi misyobo yoonse iyolila. Bayomubona Mwana a Muntu kalikuza atala lyamayoba akujulu anguzu alimwi abulemu bupati.

³¹ Uyotuma baangelo bakwe akulila kwamweembo, alimwi bayobunganya antomwe basale bakwe kuzwa kumabazu aane, kuzwa kumpela imwi kuyosika kumpela yomwe yakujulu kusikila kuliimwi.

³² Amwiiye chiiyo kuzwa kumukuyu. Aawo mutabi nuuba muteete akusyuuka matu, ngamwaziba kuti mayiinza abafwifwi.

³³ Lino zilikozyenie, naa mwabona zintu ezi zyoonse, mweelede kuziba kuti waba afwifwi, amulyango loko.

³⁴ Nchobeni ndamwambila, izyalani eeli talikoyomana pe kazitanachitika pe zintu eezi.

³⁵ Ijulu anyika ziyomana, pesi majwi aangu takwe natakamane pe.

³⁶ Pesi takukwe uuzi buzuba nikuba chiindi niziyoichitika eezi, nikuba baangelo bakujulu, nikuba Mwana a Muntu, pesi Taata alike.

³⁷ Mbuli kumazuba a Nowa, mbukuyooba kubola kwa Mwana a Muntu.

³⁸ Mbuli kumazuba kakutana boola zambangulwe bakali kulya alimwi akunywa, kabakwatana akukwatanisigwa kusikila kubuzuba Nowa mbwakanjila mubwato.,

³⁹ alimwi takukwe anchibakalizi pe kusikila izambangulwe lyabatola - lino mbukuyoba kusika kwa Mwana a Muntu.

⁴⁰ Eelyo bantu babili banoli mumuunda - umwi akati kabo uyobwezegwa, alimwi umwi

uyosiigwa.

⁴¹ Banakazi babili banoli kabaziiya aziibo - umwi akati kabo uyobwezegwa, alimwi umwi uyosiigwa.

⁴² Nkinkaako amuchenjele, nkambo tamuzi pe buzuba Mwami wenu nayoboola.

⁴³ Pesi amuzizibe eezi, kuti kwanoli mwani ngánda walizi chindi akati kamansiku sikubba namusikila, walikuno lindide alimwi talikunoleka ngánda yakwe pe kuti itululwe.

⁴⁴ Nkinkaako anywebo mulelede kulibambila, nkambo Mwana Muntu uyobola muchiindi nchimutalangelide pe.

⁴⁵ “Lino nguuli mulanda usyomekede alimwi kalimusongo ooyo wakabikwa asimalelo wakwenkuti abaambe ngánda yakwe kuchitila kuti abape chakulya kuchiindi cheelede?”

⁴⁶ Uli achoolwe ooyo mulanda uyojanwa kachita oobo.

⁴⁷ Nkasimpe, ndamwambila kuti simalelaakwe uyomubika kuti akabambe zintu zyoonse.

⁴⁸ Pesi mulanda mubi kuti waamba eezi mumoyo wakwe, 'Simalelaangu wanonoka,

⁴⁹ alimwi akatangune kuuma balanda bakwe, alimwi kulya akunywa azidakwa,

⁵⁰ lino simalelaakwe ooyo mulanda uyoosika mubuzuba ooyo mulanda mpatalibambilide pe alimwi achindi nchatazipe.

⁵¹ Simalelaakwe uzomugonkola goonkola akumwaaba kubusena kuti bakabe aamwi abasikuupawupa, ooko kuyoba kulila akuluma ntwino.

25

¹ Lino bwami bwakujulu buyokozyanisigwa abasimbi balikkumi bakabweza malampi aabo alimwi bayinka kuyochinga simusa.

² Balimusanu baabo bakali bafubafuba alimwi balimusanu bakali basongo.

³ Aawo basimbi bafubafuba nibakabweza malampi aabo, tebakabweza pe mafuta aabo.

⁴ Pesi basimbi basongo bakabweza mafuta aabo muzibikilo.

⁵ Lino simusa wakanonoka, boonse bakaguna alimwi bakoona.

⁶ Pesi akati kabusiku kwakamvwigwa ikon-golola, Ámulange, simusa! Amuzwe aanze alimwi mukamuchinge akumutambula.

⁷ Éelyo basimbi boonse bakabuka alimwi bayasya malampi aabo.

⁸ Bafubafuba bakaamba kuti kubasongo, 'mut-wabile amwi mafuta aanu nkambo malampi esu azima.'

⁹ 'Pesi bo basongo bakasandula kuti, 'mbokunga takotukwanina swebo andinywe, amwinke kuli baabo basambala alimwi mukalyulile eenu nobeni.

¹⁰ Áawo nubakachili kukuyowula, simusa wakasika, alimwi aabo bakalibambilide bakayinka aawe kupobwe, alimwi imulyango wakajalwa.

¹¹ "Kumane boobu bamwi basimbi abalabo bakaboola alimwi baamba kuti, "Simalelo wesu, Simalelo wesu, tujulile.'

¹² "Pesi wakabasandula alimwi wakati, 'Nchobeni ndamwambila, tandimuzi pe.

13 Nkinkaako amuchenjele, nkambo tamulizi izuba nikuba ichindi.

14 “Zyakozyania amwalumi wakali afwifwi akuya munyika iimbi. Wakayita balanda bakwe alimwi wabaabila buvubi bwakwe.

15 Umwi wakamupa matalenta alimusanu, mpawo umwi wakamupa aabili, alimwi umbi lubo wakamupa limwi talenta. Umwi awumwi wakatambula eecho chendelana ambuli mbakonzya, mpawo mwalumi ooyo wakeenda mulweendo lwakwe.

16 Ooyo wakatambula matalenta alimusanu wakeenda wakubuka akwabelesya mpawo wakabbindawuka ambi alimusanu.

17 Mbuboobo, oyo wakatambwide aabili alakwe wakabbindawuka wajana aambi aabili.

18 Pesi oyo mulanda wakalalimwi wakeenda, wakusya kkomba mulubuwa, alimwi wakasisa mamali asimalelaakwe.

19 Lino mumazuba simalelo wabalanda aaba boonse wakaboola wazolangelanga myeelwe yabuvubi antomwe ambabo balanda bakwe.

20 Mulanda oyo wakatambwide matalenta alimusanu wakaboola alimwi weeta aambi alimusanu. Wakamba kuti, 'Simalelo wangu, Langa, ndakakubbindawuka aambi alimusanu.

21 “Simalelaakwe wakati kulinguwe, 'waka-chita kabotu, iwe nomulanda mubotu alimwi usyomeka! Walikusyomeka muzintu ziche. Ndiyokubika kuti ukeendelezye zintu zyiingi. Njila mubusekelezi bwasilalelaako.'

22 “Ooyo mulanda wakatambwide matalenta aabili wakaboola waamba kuti, 'Simalelo wangu, wakandipa matallenta aabili. Langa, ndakab-

bindawuka aambi abili lubo.

²³ “Simalelo wakwe wakati kuli nguwe, 'waka-chita kabotu, iwe numulanda mubotu alimwi usyomeka! Walikusyomeka muzintu ziche. Ndiyokubika kuti ukeendelezaye zintu zyiingi. Njila mubusekelezi bwasi malelo wako.'

²⁴ “Eelyo oyo mulanda wakatambwide talenta lyomwe wakasika alakwe wati, 'Simalelo wangu, ndilikwizi kuti ulimwalumi ukalala. Ulatebula mpotabyalide, alimwi ulatebula mpotakwe niwamwaya.

²⁵ Ndakayoowa, lino ndakeenda mpawo ndakusiisa talenta munyika. Langa ndeeli lyako ndabozya.

²⁶ “Pesi Simalelaakwe wakamusandula wati kulinguwe, Iwe nomulanda mubi alimwi mutolo, wakaziba kuti ndilatebula aawo mpondatabyalape alimwi ndilatebula aawo mponditamwayide pe.

²⁷ Nkiinkaako wakeelede kupa mamali kulibasikulondola, alimwi kukuyobola kwangu ndakati kunobweza aangu antoomwe ayaayo alikunozyalwa.

²⁸ Nkiinkako amumubwezele talenta alimwi mulipe ooyo mulanda ulamatalenta alikkumi.

²⁹ Mpawo kuli umwi awumwi weeta zyiingi uyopegwa, alimwi uyooba azyiingi. Pesi kuliy-ooyo utayeti chintu, uyonyanzigwa nikuba eecho nchajisi.

³⁰ Mumubwale mumudima ooyo mulanda utakwe anchabede, omo mulikulila alimwi akuluma ntwino.'

³¹ “Eelyo Mwana a Muntu nayoboola mubulemu alimwi abaangelo bakwe boonse,

uyokkala achuuno chakwe chabulemu.

³² Kuyobunganisigwa misyobo yoonse, alimwi uyopambula bantu umwi akulumwi, mbuli mwembeli mbwapambula imbelele kuzwa kumpongo.

³³ Uyobika mbelele kuchilisyo chakwe, pesi mpongo kuchimweensi chakwe.

³⁴ Eelyo Mwami uyowamba kuli zeezyo zitanoli kuchilisyo kuti, 'Muze, inywe nimulongezezegwe a Taata, amujane bwami oobo mbumwakabambilidwe kuzwa kumatalikilo anyika.

³⁵ Nkaambo ndakali enzala alimwi mwakandipa chakulya.' ndakali enyota alimwi mwakandipa chakunywa.' ndakali mwenzu alimwi mwakandinjizya munganda.'

³⁶ ndakali chintanda alimwi mwakan-disamika.' ndakali kuchiswa alimwi mwakandisilika.' ndakali mujele alimwi mwakandiswaya.'

³⁷ Éelyo baluleme bayosandula alimwi kabati, 'Mwami, ndilili nitwakakubona koli enzala alimwi twakakusanina? Nikuba nyota alimwi twakakupa meenda?

³⁸ Ndilili nitwakakubona koli mwenzu alimwi twakakutambula akukunjizya? Nikuba chintaanda alimwi twakakusamika?

³⁹ Alimwi ndilili nitwakakubona kochiswa nikuba muntolongo alimwi twasika kulinduwe?'

⁴⁰ "Eelyo Mwami uyosandula alimwi uyoti kuli mbaabo, 'Nchobeni ndamwambila, nzimwaka-chitila kumunini wabakwesu, mwakazichitila ndime.'

⁴¹ Eelyo uyoti kuli baabo batanoli

kuchimweensi chakwe, 'Muzwe kuli ndime, inywe nimutukidwe, munjile mumulilo utamani ooyo ubambilidwe Satani abaangelo bakwe,

⁴² nkambo ndakali enzala, pesi temwakandipa pe chakulya; ndakali enyota, pesi temwakandipa pe meenda;

⁴³ ndakali mweenzu, pesi temwakandinjizizye pe mungánda; ndakali chintanda, pesi temwakandisamika pe; ndakali kuchiswa alimwi nikuba nindakali muntolongo, pesi takwepe nchimwakayeeya andime.'

⁴⁴ "Mpawo abalabo bayosandula alimwi kabati, 'Mwami ndilili nitwakakubona koli enzala, nikuba nyota, nikuba koli mwenzu, nikuba chintanda, nikuba kochiswa, nikuba koli muntolongo, alimwi twakaleka kukubelekela?'

⁴⁵ "Eelyo uyobasandula kuti, 'Nchobeni ndamwambila, nzimwakatachitila abo banini babaaba, temwakazichita pe kulindime.'

⁴⁶ Aaba bayonjila muchisubulo chitamani, pesi baluleme bayonjila mubuumi ibutamani."

26

¹ Lino chakaba kuti Jesu nakamana majwi aya oonse, wakati kuli basikwiya bakwe,

² "Mulizi kuti kwayinda mazuba abili pobwe lyakwindilila ngalyasika, e; yo Mwana Muntu waabwa kuti akagankaminwe."

³ Mpawo mupayizi mupati abapati bamwi babantu bakali bungene aantomwe mungánda ya-muapyizi silutwe, wikalikutegwa ngu Kkayafasi.

⁴ Bakalangula inzila isisikene kabali antomwe kuti bamwange Jesu chakumubba akuyomujaya.

⁵ Nkambo bakali kwamba kuti, “kutabi chiindi chapobwe litakwe bumena, kuti kutabi kunyongana akati kabantu.”

⁶ Lino Jesu nakali mu Bbetani munganda ya Sayimoni sichinsenda,

⁷ Nakalikulya atafula, elyo kwakasika mwanakazi wakajisi cinkuli wamafuta adula, elyo wakatila Jesu amutwe

⁸ Pesi basikwiya bakwe nibakaziba, bakabilila alimwi bakati,

⁹ “Ninzi chapa kuti aanyonyone obu? Ayaa alikuzigwa amali inyingi akuyopa bachete.”

¹⁰ Pesi Jesu nakaziba echi wakati kulimbabo, “Nkambonzi nimumukatazya mwanakazi ooyu? Nkambo wandichitila chintu chibotu.

¹¹ Bachete mulaabo chiindi chonse, pesi tamukoyooba andime pe chindi choonse.

¹² Nkambo mpatila mafuta aya amubili wangu, wazichitila kuzikwa kwangu

¹³ kasimpe ndamwambila kuti kufumbwa nkwayokambawukwa makani mabotu, munyika yoonse echi nchaachita mwanakazi oyu chinoyowambwa kuti bakamwibaluke.

¹⁴ Mpawo umwi wabali kkumi ababili, wakali kuteghwa Judasi sikaliyoti, wakayinka kumupayizi mupati

¹⁵ Alimwi wakati, “Ninzi nchimuyanda kundipa kuti ndimwabe kulindinywe?” Bakazuminana makumi ataatu ansiliva kuti bamupe.

¹⁶ Kuzwa kuleechochindi wakalangula mwenya wakumwaba kulimbabo.

¹⁷ Lino mubuzuba butaanzibwachinkwa

chitakwe bumena basikwiya bakaza kuli Jesu akumwambila kuti, “Nkukuli nkoyanda kuti tukakubambilile kuti ukalye pobwe lyakwindilila?

¹⁸ Wakamba kuti, “Ngamwinke mumyuunzi kuli umwi mwalumi akumwambila kuti, “Muyisi wati, “chindi changu chaba mumaanza. Ndiy-obamba ipobwe lyakwindilila kungánda yako abasikwiya bangu.

¹⁹ Basikwiya bakachita mbuli Jesu mbwakabal-ayilila, alimwi bakakubamba kulya kwapobwe lyakwindilila.

²⁰ Lino nichakaba chindi chagoko, wakakkala aansi kuti alye abasikwiya balikkumi ababili.

²¹ Awo nibakali kulya, wakabambila kuti, “Nkasimpe ndamwambila kuti umwi wanu uyondaaba.”

²² Bakawusa kapati, elyo umwi wakatalika kumubuzya kuti, “Zyanchonzyo tendime na Mwami?”

²³ Wakasandula kati, “Ngumwi oyo unika kuboko kwakwe andime mukabbavu ngonguwe uyondaaba.

²⁴ Mwana Muntu uleenda, mbuli mbukulembedwe atala anguwe, pesi maawe kulooyo muntu uwaaba Mwana a Muntu! Chalikubota kuloyo muntu natakazyalwa.”

²⁵ Judasi oyo wakali wakayanda kuyomuuzya wakati, “Ndime na, Mwami?” wakamwambila kuti, “walyambila olikke.”

²⁶ Kabalimukulya, Jesu wakabweza chinkwa, wachilongezya, akuchikwamuna. Wakachipa basikwiya akubambila kuti, “Mubweze, mulye.

Ooyu ngomubili wangu.”

²⁷ Wakabweza nkomeki akulumba, alimwi wakabapa akwamba kuti, “Munywe, moonse.

²⁸ Nkambo obumbulowa bwangu bwachizuminao butililwa bayingi kuti balekelelwe zibi.

²⁹ Pesi ndimwambila kuti, tandi koyonywa limbi muchelo wamasansa, kusikila mubuzuba obo mbwintakanywe bupya andinywe mu Bwami bwa Taata.”

³⁰ Lino nibakazwa kwimba lwiimbo, bakayinka kuchilundu chama oliva.

³¹ Mpawo Jesu wakabambila kuti, “moonse muyolebwa mansiku aano nkambo kandime, nkambo kuli lembedwe kuti, Ndiyowuma mwembeli alimwi butanga bwambelele buyomwayika.’

³² Pesi musule ndakubusigwa, ndiyomusan-gunina kuya mu Galili.”

³³ Pesi Pita wakati kulinguwe, “Nekuba boonse balebwa nkambo kanduwe, mebo andike tandikoyolebwa pe.”

³⁴ Jesu wakamwambila kuti, “chakasimpe ndakwambila kuti, busiku mbubobuno, mukombwe katana kukokolika, unoli wandikaka tutaatu.”

³⁵ Pita wakamwambila kuti, “Nikuba kufwa anduwe ndilakonzya, nsikoyokukaka pe. “Boonse basikwiya bakamba chomwe.

³⁶ Mpawo Jesu wakinkabo kubusena ibutegwa Gesemane alimwi wakati kuli basikwiiya bakwe, “Amukkale aano ninchiya kukukomba.”

³⁷ Wakabweza Pita abana ba Zebbedi babili antoomwe anguwe alimwi bakatalika kuba amawuse aku katazika.

³⁸ Mpawo wakati kuli mbabo, “Muuya wangu wawusa kapati, nikuba kusikila akulufu. Amuchale ano alimwi mulindile.”

³⁹ Wakayinka anembo kulekule, wakakotamika busyu bwakwe, akukomba wakamba kuti, “Taata, na chakonzeka, nkomeki eyi ngindiinde. Pesi, kutabi kuyanda kwangu, pesi kube kuyanda kwako.

⁴⁰ Wakaboola kuli basikwiya akubajanabalimukoona, alimwi wakati kuli Pita, “Niinzi, sa tamukonzyi kulindila andime hoola limwi?”

⁴¹ Amulindile akukomba kuti mutanjilimukusunkwa. Nchoonzyo Muuya ulayanda, pesi mubili wezuuka.”

⁴² Wakayinka lwachibili akuyokoomba. Wakamba kuti, “Taata, kuti echi tachikonzeke kwinda kumbali kwakuti ndinywe, kuyanda kwako kuchitwe.

⁴³ Wakaza lubo wazobajana balikoona, nkambo meso aabo akali alema.

⁴⁴ Wakabasiya lubo, wakayinka akuyokoomba kachitaatu, kayindulula majwi omwe.

⁴⁵ Mpawo Jesu wakeza kuli basikwiya akubambila kuti, “Muchoona na akulyokezya? Amulange, hola lyaba mumaboko, alimwi Mwana Muntu waabwa mumaboko abasizibi

⁴⁶ Mubuke, twinkeAmulange, oyo sikundaaba waba afwifwi.”

⁴⁷ Nakachili kwambula, Judasi, umwi wabali kkumi awumwi, wakasika, wakaaza amakamu makamu abantu kuzwa kumupayizi mupati abapati babantu. Bakeza amafulo enkoli.

⁴⁸ Lino oyo mwalumi wakali kuyanda kuuzya Jesu wakali bapede chitondezyo, chamba kuti,

“oyo ngwensikamyonte ngonguwe. Mukamu-vumpile.”

⁴⁹ Mpawawo wakasika kuli Jesu akwamba kuti, “Wapona, Omuyisi!” akumumyonta.

⁵⁰ Jesu wakamwambila kuti, “Mweenzuma, chita echo nchwazida kuzochita.” mpawo bakasika, babika maanza ali Jesu, akumuvuntila.

⁵¹ Amulange, umwi wababo bakali a Jesu wakatandabika janza lyakwe, wasomona kafulo, akuma muzike wamupayizi mupati, akumudyunkula kutwi kwakwe.

⁵² Mpawo Jesu wakati kulinguwe, “Bwedezya kafulo kako muchibikilo chako, nkambo boonse abo babweza tufulo bayolobesegwa atufulo.

⁵³ Muyeeye kuti tendali kukonzya na kwi-ita Taata, alimwi walikunditumina baangelo bayinda myuya mibi ilikkumi ayibili?

⁵⁴ Pesi alikuyo zuzikizigwa biyeni malembe, “kuti echi chichitike?”

⁵⁵ Kuleecho chindi Jesu wakati kumakamu abantu, “Mwaaza azifulo enkoli kuti muzondivuntile mbotatedi ndimubbi? Mazuba oonse ndakali kuyiisya munganda ya Leza, alimwi tamwakandaanga pe.

⁵⁶ Pesi zyoonse eezi zyachitika kuti malembe amusinsimi azuzikizigwe. “Mpawo basikwiya boonse bakamutakata akuchija.

⁵⁷ Abo bakamuvuntila Jesu bakamutola kuli Kkayafasi muapayizi mupati, oko balembi abapati nkabakabungene.

⁵⁸ Pesi Pita wakamutobeleva kule kule kusikila mulubuwa lwamupayizi mupati. Wakanjila mukati akukkala aansa abasikulinda kuti abone

chitachitike.

⁵⁹ Lino mupayizi mupati abankuta boonse bakali kulangila bukamboni bwakubeja aatala a Jesu kuti bakonzye kumubika kulufu.

⁶⁰ Takwepe nchibakajana, nekuba kuti bakamboni bakubeja bakeza. Pesi nichakaba chiindi babili bakasika.

⁶¹ Akwamba kuti, “Oyu mwalumi wakali kuti, 'Ndilakonzya kumwayula ng'anda ya Leza akwiyakulula mumazuba ataatu.”

⁶² Mupayizi mupati wakimikila akumwambila kuti, “Tukwe nsandulo na?” Niinzi zyoonse eezi nzibalokukukwambila atala anduwe?”

⁶³ Pesi Jesu wakawumuna. Mupayizi mupati wakamwambila kuti, “Ndakulayilila muli Leza upona, twambile na nduwe Kkilisito, Mwana a Leza.”

⁶⁴ Jesu wakamuvwiila kati, “wamba nduwe omwini. Pesi ndakwambila, kuzwa lino uyoobona Mwan Muntu kakkede kukuboko kwachilisyo kwenguzu, akuyoboola mumayooba akujulu.”

⁶⁵ Mpawo mupayizi mupati wakadelula zisamo zyakwe akwamba kuti, “wambula masampu! Nkambonzi nituchiyanda bukamboni? Amulange lino mwamvwa masampu.

⁶⁶ Muyeyanzi? Bakasandula akwamba kuti, “Welede lufu.”

⁶⁷ Mpawo bakamuswida kumeso akumuuma, akumuvatula mabbayi,

⁶⁸ akwamba kuti, “Tusinsimine, webo Kkilisito. Ngwani wakuuma?”

⁶⁹ Lino Pita wakalikkede aanze mukati kalub-baya lwankuta, elyo mulanda musimbi wakasika

kulinguwe akumwambila kuti, “wakalawe Jesu mu Galili.”

⁷⁰ Pesi wakazikaka kunembo lyabo boonse kaamba kati, “tandizizi pe eezyo nzyolikwamba.”

⁷¹ Lino nakazwa anze amulyango walubaya, awumwi musimbi mulanda wakamubona akwambila abo mbakalabo, “Ooyu mwalumi wakali awe Jesu waku Nazaleta.”

⁷² Wakakaka lubo chakukonka, “tandimuzipe me mwalumi ooyu.”

⁷³ Musule lyakayindi abo bakalimvwi bakasika akwamba kuti kuli Pita, “Nchamasimpe uli umwi wabo, nkambo nzila njowambula ayo ilakwamba.”

⁷⁴ Mpawo wakatalika kutukila akukonka, “tandimuzi pe mwalumi oyu,” alimwi mpawawo mukombwe waka kokolika.

⁷⁵ Pita wakayeeya majwi Jesu ngakaambide, “mukombwe katana kokolika uyonditama tutatu.” Mpawo wakaya aanze wakutalika kweema.

27

¹ Lino nikwaba kuseni, boonse bapayizi bapati abapati babantu bakalangula inzila mbubanga balamubika kulufu Jesu.

² Bakamwaanga, akumutola aanze, akumusisya kuli Payileti mwendelezi.

³ Mpawo Judasi, wakamuuzya, nakabona kuti Jesu wapegwa mulandu, wakasanduka akujosya mali yansiliva ili makumi atatu kubapayizi bapati akuzuluzi,

⁴ alimwi wakati ndabisya akwaaba bulowa butakwe mulandu. Pesi bakati, “Niinzi echo kulindiswe? Libonene olikke.”

⁵ Mpawo wakasowela aansii tumpanzi twansiliva mungánda ya Leza, akwinka, alimwi wakaya anze wakulisina.

⁶ Mupayizi mupati wakatubweza tumpanzi twansiliva akwamba kuti, “tachili mumulawu pe kuti eechi chibikwe muchiyobwedo nkambo muulo wabulowa.”

⁷ Bakambuuzyania antoomwe, alimwi bakawula muunda wamubumbi muzikkilwa beenzu.

⁸ Nkambo kacheechi, oyo muunda wakategwa, “Muunda wabulowa.” kusika lino.

⁹ Mpawo echo chakambidwe amusinsimi Jelemiya chakazuzikizigwa, chaamba kuti, “Bakabweza tumpanzi tulimakumi ataatu twansiliva, muulo wakabamba abana ba Izilayeli,

¹⁰ alimwi bakawupa kuti muunda wamubumbi, mbuli Mwami mbakandilayilila.

¹¹ Lino Jesu wakayimikila kunembo lyamwendezezi, alimwi mwendezezi wakamubuzya, “Uli Mwami waba -Juda na?” Jesu wakavwila kuti, “wamba mbubo.”

¹² Pesi nakatamikizigwa amupayizi mupati abapati, takwepe nakasandula.

¹³ Mpawo Payileti wakamwambila kuti, “Sa totumvwide twambo ntubalo kukutamikizya?”

¹⁴ Pesi takwe nakasandula niliba ijwi lyomwe, awo mwendezezi wakagamba kapati.

¹⁵ Lino kupobwe mbuli bwakali mulawu wamwendezezi kuti bagwisye umwi mwaange wasaluzigwa abantu.

16 Kuchindi eecho kwakali mwaange wakale mpewo utegwa Bbalabbasi.

17 Lino nibakabungana antomwe Payileti wakabambila kuti, “ngwani ngumuyanda kuti ndimwanguwide? Bbalabbasi na Jesu utegwa ngu Kkilisito?”

18 Wakalizi kuti bapeda Jesu kulinguwe nkambo kakwemuzya.

19 Awo nakakkede achuuno chabbetekelo, mwanakazi wakwe wakamutumina ijwi elyo lyakati, “utachiti chintu kumwalumi oyo utakwe kaambo. Nkambo ndakatazigwa loko sunu nkambo kaziloto nzindalota atala anguwe.”

20 Lino bapayizi bapati abendelezi baka-sungilizya makamu abantu kuti bakumbile Bbalabbasi, akupegwa Jesu kuti akajiigwe.

21 Mwendelezi wakababuzya kuti, “Nguuli akati kababili ngumuyanda kuti ndimwanguwide?” bakaamba kuti, “Bbalabbasi.”

22 Payileti wakababuzya kuti niinzi nchinejelede kuchitila Jesu utegwa ngu Kkilisito? Baka-muvwiila boonse bakati, Ngagankaminwe.”

23 Mpawo wakamba kuti, “Nkambonzi, mbubini mbwaachita?” Pesi bakompololesya kapati, “Mumugankamine.”

24 Lino Payileti nakabona kuti takwe chintu nchakali wajana, pesi kuti kunyongana kwakali kwatalika, wakabweza maanzi wasamba maboko kunembo lyamakamu abantu, akubambila kuti, tandikwe pe mulandu kubulowa bwamwalumi oyu. Amulibonene lwenu.”

25 Boonse bantu bakati, “Mbubo bulowa

bwakwe abube kulindiswe abana besu.”

²⁶ Mpawo wakabaangunwida Bbalabbasi, pesi wakawuma Jesu achimboko akumupeda kulimbabo kuti akagankaminwe.

²⁷ Mpawo basilumamba abeendelezi bakabweza Jesu akumutola mukati kangánda yabwendelelezi bapati akubungania nkamu mpati yoonse yabasilumamba.

²⁸ Bakamuzwatununa akumusamika bbaki lisalalisya.

²⁹ Bakaluka musini wamvwa akumuzwatika amutwe wakwe, akumubika mufunko kukuboko kwakwe kwalulyo. Bakafugama aansii kunembo lyakwe akumuniaka, kabamba kuti, “Mwalemekwa Mwami waba Juda!”

³⁰ Bakamuswida mate, alimwi bakabweza mufunko akumuuma mumutwe kabalokwindulula.

³¹ Lino nibakamuniaka, bakamuzwatununa bbaki lyabo akumuzwatika zisamo zyakwe, akumutola kuyomugankamina.

³² Awo nibakazwa aanze, bakajana mwalumi uzwa ku Sayilini utegwa Sayimoni, ngubakaangila kuti beende aamwi kuti anyumpule chiingano chakwe.

³³ Bakasika kubusena butegwa Gologota, kachamba kuti, “Mbusena bwatupepe twamitwe.”

³⁴ Bakamupa wayini uvwelene andulwe kuti anywe. Pesi nakalabila wakakaka kunywa.

³⁵ Lino nibaka mugankamina, bakabaana zyakusama zyakwe akuuma chisolo,

³⁶ alimwi bakakkala ani kabali kumulinda.

³⁷ Atala amutwe wakwe bakabikka bulembo bumubeteka, bwamba kuti, “Ooyu ngu Jesu

Mwami waba Juda.”

³⁸ Kwakali basikubba bobile mbakagankaminwa aabo, umwi kuchimweensi aumwi kuchilisyo chakwe.

³⁹ Aabo bakali kwinda enzila bakali kumutukila, kabatikinia mitwe yabo

⁴⁰ kabamba kuti, “Iwe nuyomwaya ngánda ya Leza akwiyakulula mumazuba ataatu, lifutule omwini! do kuli Mwan a Leza, seluka achingano aawo!”

⁴¹ Munzila ikozyenie abalabo bapayizi bapati bakali kumuniaka kabala balembe abapati kabamba kuti,

⁴² wakali kufutula bamwi, pesi we takonzyi pe kulifutula. Ngu Mwami wa Izilayeli. Ngaseluke aachingano, alimwi tuyomusyoma.

⁴³ Wakali kusyoma Leza, Leza ngamuvune lino, na Leza kayanda kumwanguununa. Nkaambo wakali kwamba kuti ndimwana a Leza.”

⁴⁴ Munzila ikozyenie abalabo basikubba mbakagankamidwe aabo abalabo bakamutukila.

⁴⁵ Lino kuzwa kuchindi chahola lamusanu alimwi mudima wakasikila nyika yoonse kuyosika kuhola lyamusanu aane.

⁴⁶ Nichakaba chiindi chamusanu mwaane, Jesu wakoopolola ejwi pati kaamba kuti, Eli, Eli, lama, sabakkatani?” Kazyamba kuti, Leza wangu Leza wangu, nkambonzi niwandisiya?”

⁴⁷ Lino abo bakiimvwi mpawo bakazimvwa, bakaamba kuti, “ulikwiita Elayija.”

⁴⁸ Mpawo umwi wakachijana akuyobweza nsisa akwizuzya awayini ulwela, wakisekka ku-

mufunko, elyo wakamupa kuti ayinywe

⁴⁹ Bayingi boonse bakati, mumuleke alikke, Tumubone na Elayija uleza na kuzomufutula.”

⁵⁰ Mpawo Jesu wakalila lubo ajwi pati elyo wakapa muuya wakwe.

⁵¹ Amubone, chisitilizyo changánda ya Leza chakanduka muzimpanzi zibili kuzwa kujulu kusika aansu, anyika yakandendema, amabwe akaanduka.

⁵² Tubanda twakavunuka, amibili yabasalali bakali boona yakabusigwa,

⁵³ Bakazwa mutubanda musule lyakubuka kwakwe, bakanjila mugunzi lisalala, akuboneka kubayingi.

⁵⁴ Lino silumamba mupati abaabo bakali kulinda Jesu bakawubona muzuzumo azintu zyakachitika, bakayoowa baamba kuti, “Chamasimpe ooyu wali Mwana a Leza.”

⁵⁵ Banakazi biingi bakali batobela Jesu kuzwa ku Galili kuti bamukutawukile bakali kulanga alaale.

⁵⁶ Akati kabo kwakali Meli Magadalini, Meli banyina ba Jemusi a Jozefa, abanyina babana ba Zebbedi.

⁵⁷ Lino nilyakaba goko, kwakasika mwalumi uzwa ku Alimatiya, utegwa Jozefu, wakali sikwi-
iya wa Jesu.

⁵⁸ Wakayinka kuli Payileti akuyokumbila mutunta wa Jesu. Mpawo Payileti wakalayilila kuti awupegwe.

⁵⁹ Jozefu wakabweza mutunta, wamuzambilila mulembo utenteema,

⁶⁰ wakulazika mukabanda kakwe kapya

nkakali wafokola mubbwe. Mpawo waka
kkunkulisya ibbwe pati wasinka amulyango
wenda.

⁶¹ Meli Magadalini amumwi Meli bakaliwo,
bakalikkede kulubazu lyakabanda.

⁶² Buzuba bwakatobela bwakali buzuba
bwinda bwakulibambila, bapayizi bapati
abaFalisi bakali bungene antomwe a Payileti.

⁶³ Bakali kwamba kuti, “Mwami, tuchiyeeya
ulya silweni nakachili kupona, wakaamba kuti,
“kwinda mazuba ataatu ndiyobuka alubo.”

⁶⁴ Nkinkaako layilila kuti kabanda kakwe
kalindwe kusikila kubuzuba bwatatu. Chimwi
chindi ulabona basikwiya bakwe basika
bazomubba akwambila bantu, 'Kuti wabuka
kuzwa kubafu.' Alweeno lwakumamanino
ngalulayinda lwakusanguna.”

⁶⁵ Payileti wakabambila kuti, “mwinke
mukalinde mbuli mbumukonzya.”

⁶⁶ Mpawo bakiinka akuyochita kuti kabanda
kalindwe, bakazilulula abbwe akubikka
basikulinda.

28

¹ Lino niyakayinda isabata, kakuya kubuchedo
mubuzuba butanzi bwamviki, Meli magadalini
awumwi Meli bakaza kuzolanga chibunda.

² Amulange, wakaba muzuzumo mupati
wanyika, nkambo angelo wamwami wakaseluka
kuzwa kujulu, wakaza akukunkulisya ibbwe,
akukkala alindilo.

³ Chiiwa chakwe chakali mbuli lulabi,
azyakusama zyakwe zyakalikutuba mbuli
buluba bwatonje.

⁴ Balindizi bakandengenda akuyowa alimwi bakaba mbuli bantu bafwide.

⁵ Mu angelo wakazibya banakazi akwamba kuti kulimbabo, “Mutayowi, ndilizi kuti mulangula Jesu, wakagankaminwa.

⁶ Tawope okuno, pesi wabuka, mbuli mb-waakamba. Amuze mubone abusena Mwami mpakalilazikidwe.

⁷ Mwinke chakufwambana alimwi mwambile basikwiiya bakwe, 'wabuka kuzwa kubafu. Amubone, ulikunembo lyanu kuyaku Galili. Ámulange, ndamwambila.”

⁸ Banakazi bakazwa mukabanda chakufwambana kabala akuyoowa akukondwa kupati, alimwi bakachijana kuyowambila basikwiya bakwe.

⁹ Amulange Jesu wakabaswania akubambila kuti, “Mwaponal!” Banakazi bakaza, bajana mawulu akwe akumukomba.

¹⁰ Mpawo Jesu wakabambila kuti, “Mutayowi. Amwinke mwambile bakwesu kuti bayinke ku Galili. Nkuko nkubayondibonena.”

¹¹ Lino awo banakazi nibakalikwenda, Amulange, bamwi babalindizi bakayinka mugunzi akuyowambila bapayizi bapati zintu zyoonse zyakachitika.

¹² Lino bapayizi nibakaswanana abapati akuyooma aabo ikkani eeli, bakapa mali nyiingi kuli basilumamba

¹³ akubaambila kuti, “Mwambe kuti kuti bamwi, 'Basikwiiya ba Jesu basika mansiku akubba mutunta wakwe nitwachilikoona.

¹⁴ 'kuti na makani aya asika kumwendelezi, tulamukombelezya akugwisya makatazyo al-

imulindinywe.”

¹⁵ Mpawo basilumamba bakabweza mali akuchita mbuli mbubakalayililwa. Aya makani akamwayika kapati akati kama Juda alimwi akeendelela anembo nikuba asunu.

¹⁶ Pesi basikwiiya ibalkkumi awumwi bakayinka ku Galili, kuchilundu oko Jesu nkwaabalayilila.

¹⁷ Mpawo nibakamubona, bakamukomba, pesi bamwi bakadoneeka.

¹⁸ Jesu wakaza kuli mbabo akwaambula abo akuti, “Nguzu zyoonse ndakazipegwa kujulu aansu.

¹⁹ Aboobo amwinke alimwi mukachite basikwiiya bamisyoo yoonse. Mukaba bbabbatizye muzina Iya Taata, Iya Mwana, alya Muuya Uusalala.

²⁰ Mubayiisye kulemeka zintu zyoonse nzindakamulayilila, amubone, ndilandinywe chiindi choonse, nikuba kusikila kumamanino.”

Dombe New Testament

The New Testament in the Dombe language of Zimbabwe

copyright © 2020 Door43 World Missions Community

Language: Toka-Leya-Dombe (Dombe)

Translation by: DUBE MAKEYI S, Denis, Keepers, Smart, Leviticus, Lusy-omo, David, Charles, Ian, Daimon, Gedion., ELEK, Faith, Leviticus Muleya, Lucy Ngosolo, Makeyi S Dube, Makeyi s dube, Muleya Nkondo, Purpoe Mumpande, Purpose, Richard, Stephen, Samson, Nkondo, Mackion, Elek, Wilson, Dickson, January, Betty, Stephen, TOM-88PN_0003.MACHINGA, iii9i, nkondo, onesai misioni, patricia banda, peaceful, purpoe, victor

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

- You include the above copyright and source information.

- If you make any changes to the text, you must indicate that you did so in a way that makes it clear that the original licensor is not necessarily endorsing your changes.

- If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2020-07-06

PDF generated using Haiola and XeLaTeX on 13 Dec 2025 from source files dated 12 Dec 2025

c53dd3b7-ff72-5846-98a6-1807fcd544f4